

PAGSAGOP ⁴

 Igsoong Neville, ug maayong hapon, maayong gabii, diay, sa atong bililhong mga higala, malipayon kita nga makabalik dinhi sa simbahan karong gabhiona. Medyo maigang, ug mao nga paningkamotan nato nga dalion kini, nga adto na diretso sa Mensahe.

Una, aduna kita'y pipila ka mga pahibalo nga pagahimoon, ug usa—usa ka espesyal nga hangyo aron maiampo. Nadawat na nako ang inyong mga surat didto sa likod, nga gipahatag, ug para sa igsoong babaye nga nagabati'g may tumor siya sa utok. Ug aduna pa'y usa didto sa Louisville; ug igsoon sa usa pud ka ministro, nga giatake sa kasingkasing ang iyang amahan; ug daghang, daghang mga tawong may sakit sa kalibutan karon. Daghan ang nagapanawag ug nag-ampo gyud kami para kanila sa kinasingkasing, nga tabangan kita sa Dios.

Kasagaran mga anaa sa nubenta'y-singko porsiyento sa ministerio ko ang kanunay'ng ingon niana, nagaampo para sa mga masakiton, nakita n'yo, pero ako—medyo aduna ako og usa ka—mora ba'g diyutay'ng ideya nga . . . pero nagaampo gihapon ko para sa mga masakiton, ha, hinumdumi ninyo kana. Kakuyog na man gud kana kaniadto pa. Pero, oh, kung mapuwesto lang nato ang—ang iglesia nga nakaposisyon na, dayon, ug mahan-ay na para kita makasugod na sa pagpamuhat, nakita n'yo. Kinahanglan nga mahan-ay na og ayo, kita n'yo, mahiusa ang tanan.

May usa pa nga misantop sa akong kasingkasing, kaganina lang gyud. Sa diha nga ang gamay'ng tigulang nga beteranong lalaki, ang usa sa iyang mga bukton halos maputol sa pagkapusil, ang batiis halos maputol sa pagkapusil pud. Wala siya dinhi para madungog niya unta ako karon. Pero usa gayud siya ka dungganong lalaki, nga ginganlan og Roy Roberson, ug usa sa mga sinaligan nato dinhi sa iglesia, ug usa ka buutang Cristohanong lalaki. Miduol lang siya didto, ug miingon, “Igsoong Branham, ayaw kalimti ang Presidente.” Ingon pa, “Nalooy ako og ayo niadtong migawas siya,” nakita pud nako sa telebisyon, “niadtong nagapanaug siya sa eroplano, nga midagayday ang mga luha sa iyang mga aping, ug nga nagahibi ang iyang baba.” Kabalo mo, didto siya mismo nga kauban ni Roy ug uban pa, didto sa—sa maong giyera.

Bisan unsa pa ang di mo pag-uyon sa iya sa politika, siya gihapon ang atong Presidente. Oo, sir. Para kanako, ako—dili ako Democrat ni Republican. Usa ako ka Cristohanon. Apan ako—sultihan ta mo, siguradong may dakung pagdayeg ako kang—kang Presidente Dwight Eisenhower. Sir, siguradong

usa siya ka dugay nang halangdon nga tawo, sa ako nga—nga panghunahuna. Kung modagan man siya pag-usab, ug mobotar ako, siya ang akong botaran pag-usab. Husto kana. Dili ko igsapayan kung siya—kung siya'y gatus na ang panuigon, botaran gihapon nako siya, tungod kay nagustohan nako siya. Ug hinumduman nato siya sa atong mga pag-ampo karong gabhiona.

J. T., gipasalamatan gyud nako ang maanindot nga tigum, kamong tanan, nga gipahigayon ninyo ug ni Igsoong Willard niining semana. Kung misulod siguro ko imbes nga sa gawas lang, tanan mo siguro misulti na'g, "Sige, karon Igsoong Branham, kabalo ka, *ingon niini-ug-ingon niana*." Pero mas maayo pa nga magtindog na lang didto sa gawas ug maminaw sa inyo, di ba ninyo makita? Sige. Busa, maanindot gayud.

May pipila ako nga mga itanyag para sa pipila ka mga iglesia, kung gusto ninyo tanan ang mga niini, kung andam na kamo nga magpastor, kung nabansay na kamo. Ug, nga, nagatoo man ako nga nabansay na kamo, ug andam na mismo. May usa ako didto sa Oregon, ang uban sa Washington, California, ug Arizona, sa nagkalainlaing mga lugar. Ug kung gusto ninyo magpastor og usa ka iglesia o unsa man, aba, dinhi mismo ang maayong lugar para magsugod, dinhi mismo. Ug dunay mga kalag nga nagatuaw sa tanang lugar, bisan didto sa mga Indian reservation ug sa unsa mang lugar nga gusto ninyong adtoan. Ipahibalo lang ninyo kanamo, tungod kay nagatoo ako nga kamong mga kalalaken-an nakaangkla na gayud. Husto kana. Ganahan gyud ko nga makita sila nga buhaton kana.

Anaa si Igsoong Ruddell nga nagpadulong na. Moadto ako didto para magpahigayon og tigum para kaniya, sulod sa pipila ka adlaw. Magpahigayon og usa ka rebaybal, si Igsoong Ruddell. Ug ako—nadumduman ko pa nga kaniadto ginapapanglimbasog nako ang maong igsoon sa bisan asa na lang, gipaningkamotan nga ipasangyaw siya sa buluhaton ug magwali. Manggiulawon kaayo siya. Moingon siya, "Maglisud man gud ko og sulti." Kinahanglan ninyo siya nga madungog. Amen. Kita n'yo? Wala lang mo mahibalo kung arang n'yong mabuhat kung tugotan ninyong makontrolar sa Balaang Espiritu. Husto kana.

Ug si Igsoong Graham Snelling pud sa Utica, ug si Igsoong Junior Jackson didto. Atong—gikonsiderar nato silang tanan ingon nga gagmay'ng kaigsoonang mga iglesia, nga kauban mismo nato. Magkauban kitang tanan. Wala kita'y mga dili pag-uyon sa atong mga doktrina, ni sa mga panghinaut ug mga katuyoan, ang atong mga doktrina, usa ra. Managkauyon kitang nagabarug, nagkahiusa sa tanang butang. Usa ra kita ka iglesia. Ug siguradong gusto natong mokaylap ang mga niini sa tanang lugar; may pipila na kita sa Africa, pipila sa India, ug sa tanang palibot, sa tibuok nasud. Didto nato sila gustong mapahimutang, nga ginapakaylap ang Balita.

Ug nakita nako nga nangahamtong na kining mga batan-on, sama nila ni Igsoong J. T. Parnell dinhi, ug—ug ni Igsoong Willard ug ang uban pa, sa dihang nagakahamtong na sila, nga mga batan-on, nga ako usab nagakatigulang na. Kung aduna pa'y ugma, sila ang mamahimong mga mamumuo ugma. Dili ko gustong mamatay kining Mensahe. Dili gyud mahimong mamatay Kini. Kinahanglan nga magpadayon gyud Kini. Ug dili ko motoo nga daghan pa kita og panahon para dalahon Kini.

Kadtong gamay'ng bata nga giingon nila nga mamatay na, nakita ko nga kugoskugos mo siya sa simbahan tibuk adlaw, igsoon. Maanindot gyud kana. Ginapasalamatan nato ang Ginoo tungod niana, nga ang Ginoo puno gayud sa grasya, puno sa kalooy. Padayon mo lang nga toohan kung unsa ang gisulti sa imo dinhi mismo, kita n'yo, mamaayo gayud kini.

Karon, nangalipay ba mo sa mga gitudlo? Gusto ba ninyo ang pagpanudlo? [Nagaingon ang kongregasyon, "Amen."—Ed.] Oh, ako—ako—nagatoo gyud ko nga kaayohan ang ginahatag niini kanato. Ginapapahulay kita niini og diyutay sa pagpang-ampo para sa masakiton, ug mga panan-awon, ug Balaanong pagpang-ayo. Siyempre pud, karon, niining gabhiona kita... Human sa serbisyo, mag-ampo na pud kita para sa mga masakiton, karing gabhiona. Kanunay natong gustong buhaton kana, ang bautismohan ang si kinsa man sa unsa mang oras.

Pila ang nakahinumdom niadtong ginasubay ko pa sa pag-inspeksyon ang mga linya sa kuryente? Bueno, ginasubay ko mismo sa pag-inspeksyon ang mga linya sa kuryente kaniadto, sa daghang higayon, kinahanglan kong latason ang traynta ka milya kada adlaw agi niadtong kamingawan. Aduna ako og duha ka gatus ug otsenta ka milya sa linya nga kinahanglan kong inspeksyonon. Baktason ko kadto, nga gunit ko na ang kamison, ug, oh, gikapoy ko og ayo, ginabaktas kadtong mga lasang, ug nagkasamad-samad na sa mga lunhaw'ng sampinit. Aduna ko'y matagbo nga tigulang nga mag-uuma ug manglingkod mi pasilong sa kahoy ug makighinabi kaniya mahitungod sa pagpabautismo sa Ngalan ni Ginoong Jesus. Moingon siya, "Bueno, kaniadto pa man kong gusto magpabautismo."

Ingon ko, "Dili man kaayo layo ang padulong sa sapa." Ug moingon siya...

Ug daghan kanila ang gidala ko didto ug gipangbautismohan sila sa Ngalan ni Jesus. Dalidali ko dayon balik didto sa pag-inspeksyon sa linya, kutob sa mahimo ko. Husto kana. Daghang higayon nga bisan sul-ob ko pa ang mga daan kong pangtrabahoay nga bisti, duna ko'y gibautismohan, pagkahuman mibalik dayon katkat sa poste. Nagtrabaho usab ako kaniadto taas sa poste; usa ako ka lineman sa kuryente kaniadto, usab, samtang didto ako nagatrabaho taas sa poste, duna ko'y kaestorya nga lalaki, nakigsulti kaniya mahitungod sa

Ginoo. Ingon niya, “Aba, Billy, usa sa niining mga adlaw moadto ko mismo sa inyong simbahan og magpabautismo.”

² Ingon ko, “Nganong gustohom mo pa nga maghulat hangtud nianang adlaw? Ania daplin lang man nato mismo ang sapa, daghang mga tubig mismo dinha.” Ayaw na sila buhii. Husto kana. Kana na ang higayon. Miingon si Felipe kaniadto . . .

³ Miingon ang eunoco kang Felipe, “Ania ang tubig, unsa pa ma’y makababag kanato?” Husto kana. Wala na. Kung nakaandam ka na, kana na ang higayon. Ayaw tugoti nga ang yawa makabutang pa og babag sa kung unsa dinha. Ayaw na paugmai pa ang mga butang nga mahimo nimong buhaton karon. Basin unya dili na moabot ang ugma para sa imo. Nahinumdum ako usa niadto ka higayon nga nahimo ko kana, nakakat-on na ako, na-leksyonan ako. Napalagpas kong buhaton ang usa ka butang nga gibuhat ko na unta sa usa niana ka adlaw, ug pagkasunod adlaw ulahi na kaayo.

⁴ Karon, sa tinuod lang ayaw ko kamong padugayon dinhi og ingon niini kataas nga oras. Pero daw sa—sa naghinamhinam na gyud ako, ug, dili ko mapugngan, pagkamaayo gayud sa akong gibati hangtud nga wala na ako sa akong kaugalingon, halos. Pagkamaayo gayud sa akong gibati.

⁵ Karon iduko nato ang atong mga ulo sa makadiyut lamang sa dili pa nato hisgotan ang Pulong.

⁶ Among Langitnong Amahan, Ikaw ang buhi nga Dios, nga buhi sa kahangturan. Ang adlaw nga bag-o lang nagsalop, ang mao mismong adlaw, nga gilantaw ni Daniel sa pagsalop niini, gilantaw usab ni Jeremias nga misalop, gilantaw usab kini ni Adan nga misalop, gilantaw usab kini ni Jesus nga misalop. Ug mao ra kini ang kalibutan nga gipuy-an nila kaniadto ug ginalakwan, ug nagpabilin Ka nga mao ra sa gihapon nga Dios.

⁷ Karong gabhiona adunay daghang mga hangyo. Usa ka tawo nga may tumor sa utok, usa ka igsoong babaye nga gikabalakan ang mao rang butang. Ikaw lamang ang bugtong paglaum, Ginoo, nga aduna para niana. Nagkagrabe na kanang tumor, og dili na gyud mapugngan pa. Lagpas na kini sa arang mahimo sa mga kamot sa doktor. Apan karong gabhiona nagaadto kami nga dala ang among gamay’ng lambuyog, sa pagluwas nianang karnero, aron nga maibalik kini sa panon sa Amahan. Sa Ngalan ni Ginoong Jesus among ginapuntirya ang among pag-ampo aron patyon ang maong leon, ang tumor, ang pagpangdaot niini, para luwas na nga maibalik sila sa panon.

⁸ Ug kami, Dios, ginadumdum karong gabhiona ang among hiligugmaong Presidente, ang among igsoon, ang among Dwight Eisenhower. Gigiyahan niya kining nasura, Ginoo, gipaningkamotan niya nga iiway kami sa giyera. Gisaad niya nga mamahuman na ang giyera sa Korea kung aduna siya’y mahimong paagi. Gisaad niya ngadto sa mga inahan nga dalahon

niya og balik ang kadtong mga batan-ong kalalaken-an. Apan miingon siya, “Kung ako ang mohimo niini, dili ko kini mahimo. Puede kong ipursige, pero ang Dios lamang ang gikinahanglan nga mobuhat niini.” Ug giubanan Mo siya, Ginoo, ug karon human na ang tanan. Nganong wala nila makita kana niadtong una pa lamang? Dios, nagaampo ako nga tabangan Mo siya. Panalangini kanang maisogon nga kalag, Ginoo. Ug ginaampo namo nga Ikaw ang magpili para kanamo sa among sunod nga lider. Ang Imong gipili-nang-daan ang mamatuman, Ginoo.

⁹ Pero ang Usa nga interesado kaayo kami karong gabhiona, gawas sa among nasudnong mga kalihokan, mao ang gamhanan ug mahimayaong Usa nga umaabot para ibarug ang usa ka Ginghamian nga wala’y katapusan, ang Ginoong Jesus, Imong Anak. Dayon ipangkamada na lang nila ang mga armas, ang mga pang-kasundalohang tugtog sa hinapos manggitukar ug wala na’y mga giyera pa. Manggitanum sila og mga parasan ug mangkaon sa mga bunga niini. Manggitukod sila og mga balay, manggipuyo sa mga niini. Ug wala na’y mamahimong kagubot pagkahuman unya.

¹⁰ Panalangini kami karon samtang nagaduol kami sa Pulong. Ug, Amahan, nahibaloan Mo ang hinungdan nga nagaduol ako sa Pulong gikan niini mismong Kasulatan dinhi. Tungod kini sa akong—gibati nako nga gusto Mo nga buhaton ko kini sa ingon niining paagi, nga kini ang Imong Balaanong kabubut-on, anaa kini sa Imong programa, anaa kini’y . . . nga kini ang tukmang tulumanon alang sa karon, para tugotan ang mga tawo nga makaplagan nila ang ilang hustong puwesto ug mamahimong andam para sa oras sa pagpakigbugno. Sama sa giingon sa among igsoon sa iyang pag-ampo sa Imo dili pa lang dugay, “Oh, gibansay Mo kami sa dugay na, Ginoo.” Karon, Amahan, iplastar Mo na kami sa among mga posisyon. Ipahiluna kami dinha sa kung unsa ang angay namong pagabuhaton, aron mabuhat na namo ang buluhaton sa Amahan. Kay gipangamuyo namo kini sa Ngalan ni Jesus, nga Imong Anak. Amen.

¹¹ Nagkaaduna ako og maanindot nga hapon karong hapon, sa pagpakighinabi sa usa ka inila nga doktor didto sa Louisville, sa iyang nars. Nadungog nila ang mahitungod sa mga mahimayaong butang sa Ginoo. Ug usa ka doktor ang iyang amahan. Ug mibisita siya sa balay ug naglingkod sa sulod halos sa tibuk hapon, basta miabot lang, nga nakadalikyat. Usa ka buutan nga tawo; dili basta-basta motoo, kabalo na mo, medyo usa ka deboto, tinuud nga Presbyterian sa sugod pa lang, pero milakaw nga may mga luha nga nagadagayday sa iyang mga aping. Oh, ako . . . Gipangpuwesto sila sa Dios bisan asa, sa mga opisina sa doktor, mga nars. Di ko motoo nga adunay nars sa Norton’s Infirmary Hospital nga wala ko gisultihan mahitungod sa pagpakabaton sa Espiritu Santo, ug gipangutana kung nabautismohan na ba siya sa Ngalan ni Jesus.

Wala'y doktor nga nahimamat ko, bisan asa, o wa- . . . Kita n'yo?

¹² Isulti gyud n'yo kanila ang bahin Niini. Wala na baya kita'y igong panahon, igsoon. Bisan unsa pa ka malisud dinhi, hulaton mo lang hangtud nga patabok ka na nianang imong katapusang gininhawa ug makita mo, ayha mo maamgo nga unta gibuhat mo kadto. Oo, sir. Ayaw na mo maghulat pa hangtud nianang orasa, buhaton na nato kini mismo karon. Kini na ang oras. Oh, tingali dili sila mouyon, ug masuko pa gani ug medyo makiglantugi bahin niini, pero wala nila kini tuyoa. Wala nila kana gituyo. Sila—sila—maayo man sila. Pagmakiglantugi sila sa inyo, inyo—inyo lang hinumduman, sila—wala nila kana tuyoa. Wala nila kana tuyoa. Tingali natudloan lang sila og kung unsang butang ug nanagtoo sila mismo niana, busa inyo—makita man pud nimo ang ilang mga opinyon. Ayaw mo pagpakiglantugi kanila, ayaw pagpakiglantugi ni bisan kinsa, kondili higugmaa lang ninyo sila samtang ginaagak n'yo sila ngadto Niini. Dayon iampo ninyo sila.

¹³ Bueno, sa tan-aw ko nakaabot na kita sa ika-9 nga bersekulo, dili lang ko sigurado. Layo pa kana sa ika-3 nga kapitulo, di ba, mga igsoon? Pero oh, Kini'y dugos sa bato, para kanako! Pagahisgotan nato karon, hinumdumi, para makuha nato ang gamay'ng basihanang pag-usab. Ug karon, Igsoong Neville, ikaw—medyo birahon mo lang ako gamay ha kung dili ko makita ang oras nga pahurot na diay, para makapahigayon pa ako og pag-ampo alang sa masakiton. Gusto nato nga mahisgotan ang matag gamay'ng bahin nga mahimong hisgotan nato. Ug karong gabhiona gusto ko magpahigayon og pagtawag sa altar. Ako. . . Sa pagtapos niini basin basahon ko na lang ang uban niini.

¹⁴ Pero ang katuyoan niini, mao, nga makita mo ang posisyon mo kang Cristo, nga makita nga dili kini usa ka butang nga basta mo na lang nakaplagan, o butang nga mahimong adunay . . . nga daw sa may nahimo pud ka sa kung asa, kondili kini ang gibuhat sa Dios para sa imo, Siya Mismo. Dili sa pagkabuutan nimo nga nagsimba ka usa niana ka gabii, nga usa ka kabus nga igsoon ang nagpaadto sa imo ngadto sa altar. Ug dili kini ingon niana. Ang Dios kana, sa wala pa ang pagkatukod sa kalibutan, gipili-nang-daan ikaw ngadto sa Kinabuhing Wala'y Katapusan. Sa dihang nakaabot na kamo didto nianang adlaw, dili ikatingala ang kuwarenta . . . gibutang sa baynte-kuwatro ka anciano ang ilang mga purongpurong, gipangbutang sa tanan ang ilang mga purongpurong, nanaghapa ang tanan, wala sila ni usa ka butang nga ilang masulti, wala'y magwawali, wala'y anciano, wala'y bisan unsa. Ang tanan pagdayeg gayud sa Cordero! Pagatigumon sa Dios sa Iya ang tanang butang nianang adlaw. Oh, kung mahibaloan lang nato ug maila kung Kinsa kadto Nga gilansang nila sa krus. Karon sa . . .

¹⁵ Magsugod kita sa ika-8 nga bersekulo, para makakuha og gamay'ng basihanang.

Nga iya nga gipadagaya alang kanato sa bug-os nga kaalam ug salabutan;

Nga iyang gipahibalo nganhi kanato ang tinago mahitungod sa iyang kabubut-on, . . .

¹⁶ “Ang tinago mahitungod sa iyang kabubut-on.” Ug hinumdumi kung unsa kita kadugay nga nagpabilin niana? Pila ang ania kaganinang buntag, tan-awon daw nato. Kung unsa kita kadugay nga miungot niana, “ang tinago mahitungod sa Iyang kabubut-on.” Karon, dili lang kini nga gamay’ng butang, mao nga usa kini ka tinago. Ang kabubut-on sa Dios mao’y usa ka tinago. Ug kinahanglan nga hibaloon sa matag tawo ang kabubut-on sa Dios para sa maong lalaki o sa maong babaye, ang tinago sa Dios.

¹⁷ Unsaon nato sa paghibalo? Si Pablo, napadayag kini ngadto kaniya. Ingon niya nga wala siya magpakisayud ni kinsa mang tawo, wala’y unod ug dugo. Wala siya’y gi-eskwelahan, wala’y seminaryo. Wala siya’y unsa man nga kahilambigitan niadto. Apan siya . . . Gipadayag kadto kaniya ni Jesus Cristo, Nga natagbo niya sa dalan padulong sa Damascus, diha sa usa—usa ka Kahayag sama sa Haliging Kalayo, ug gitawag siya Niini. Ug miadto siya sa Arabia, ug nipuyo didto og tulo ka tuig. Oh, dili ba nimo maamgo nga medyo taas-taas pud kana nga panahon, Igsoong Egan? Tulo ka tuig si Pablo nga atua didto sa Arabia, nag-abang siya og usa ka gamay’ng puy-anan sa kung asa man, nagsige’g lakaw pabalik-balik, nga dala-dala kadtong tanang mga daang basahong-linukot. Wala pa sila og niining mga bag-o niadtong panahona; si Pablo ang nagsulat sa kadaghanan niini, halos. Gisulat niya sa niining mga daang basahong-linukot, kung unsa nga ang Dios, sa sinugdanan, gipili-nang-daan kita ngadto sa Kinabuhing Wala’y Katapusan. Kung unsa nga gipadala Niya si Jesus, nga pinaagi sa niining Halad magkaaduna kita og katungod sa Kahoy sa Kinabuhi. “Kadtong Iyang mga giila-nang-daan, Iyang gitawag; kadtong Iyang mga gitawag, Iyang gimatarung na; kadtong Iyang mga gimatarung na, Iyang gihimaya.” Ang Dios, sukad pa sa sinugdanan sa kalibutan, gipili-nang-daan kita ngadto sa pagka-sinagop ingon nga mga anak. Karon ang tibukok nga kabuhatan nanag-agulo, nga nagahulat na sa pagpadayag sa mga anak sa Dios. Oh, mapamalandung ko si Pablo nga nalipay kaayo. Gusto nako nga maatua unta nga kauban niya. Di ba kamo man pud?

¹⁸ Karon giingon niya, “Gipadayag Niya kanato ang tinago.” Pasudla ra ang Balaang Espiritu kanimo usa ka higayon, ug sugdan mong tun-an Kana ug matikdi kung unsaon Niini paglihok. Kaganinang hapon nagkaaduna ako, oh, mga traynta ka minuto aron magtuon, para lang balikan ang maong hilisgotan; tingali dili man, moingon ko nga katunga lang niana, kinse ka minuto tali sa mga oras. Ug gisugdan kong tun-

an, ug nahunahuna ko, “Ang maong tinago, grabe gayud ka misteryoso!” Ug gidala ako sa Kasulatan pabalik sa Daang Tugon, dayon pabalik na usab sa Bag-ong Tugon; may butang nga natakdo, nakita ko ang tinago mahitungod sa Iyang Pag-anhi, ang tinago sa Iyang kabubut-on, ang tinago sa paglingkod nato nga magkauban. Hinumdumi, dili kini maitudlo sa bisan unsang seminaryo. Usa kini ka tinago. Dili ninyo kini mahibaloan pinaagi sa edukasyon, sa teolohiya. Usa kini ka tinago nga gililong sukad pa niadtong pagkatukod sa kalibutan, nga nagapaabot sa pagkapinadayag sa mga anak sa Dios.

¹⁹ Sultihi ko, akong igsoon, sultihi ko, akong igsoong babaye, kanus-a ba gyud ang panahon nga maipadayag ang mga anak sa Dios gawas sa niining panahon karon? Kanus-a ba nagkaaduna og panahon sa kasaysayan, kon diin ilang igapadayag ang panahon nga ilang luwason ang tibuok kinaiyahan? Ang kinaiyahan, ang kinaiyahan mismo nanag-agulo, nanagpaabot alang sa panahon sa maong pagkapinadayag. Aba, bisan niadtong wala pa ang pagbayad sa kasal-anan, sa wala ba gibubo ang Espiritu Santo, sa wala pa ang tibuok—ang tibuok Daang Tugon, sukad-sukad kaniadto, wala pa nahitabo ang maong pagkapinadayag. Gikinahanglan niini nga magpaabot hangtud sa niining panahon. Karon ang tanang butang nagakahitabo na, nagapaingon na, nagakaporma na ngadto sa pangpurong-purong nga bato, ngadto sa pagkapinadayag sa mga anak sa Dios nga nagakahitabo na, ug ang Espiritu sa Dios nga nagakunsad na sa niining mga kalalaken-an, sa ingon ka hingpit gayud, hangtud nga ang ministerio nila mamahimong halos magkapareho na gayud sa kang Cristo hangtud nga mahiusa na Siya ug ang Iyang Iglesia.

²⁰ Pila na ba ang nagtuon sa kasaysayan sa mga piramide? Siguro tingali’g usa ang gining dinhi nga nagpataas sa iyang kamot. Bueno.

²¹ Nagsulat ang Dios og tulo ka Biblia. Ang usa sa mga niini mao ang Zodiac diha sa kalangitan, mao kana ang unang Biblia. Gikinahanglan maghangad ang tawo aron maamgo nga gikan sa itaas ang Dios. Sunda ang Zodiac, nagtuon na ba mo niini? Gipahayag pa gani niini ang matag kapanahonan, bisan ang kapanahonan sa kanser. Gipahayag niini ang sinugdanan, ang un-...ang pagkapanganak kang Cristo. Unsa man ang unang hulagway diha sa Zodiac? Ang ulay. Unsa man pud ang kaulahiang hulagway? Si Leo nga leon. Ang unang Pag-anhi ug ang ikaduhang Pag-anhi ni Cristo, ang tanan niini nahisulat na dinha.

²² Dayon gisulat ang sunod nga Biblia, diha sa bato, nga gitawag og “mga piramide.” Nagsulat ang Dios diha sa mga piramide. Kung tun-an n’yo kining mga piramide, matikdi n’yo ang mga karaang kasaysayan ug mga giyera, kung giunsa

pagtukod sa kining mga piramide bisan niadtong wala pa ang paggun-ob sa kalibutan pinaagi sa tubig.

²³ Ang ikatulo gisulat diha sa papel, ang Biblia, para sa moabotay nga bantugan, maalamong kalibutang intelektuwal. Karon, sa paglatas sa Dios sa panahon, ania na kita sa Leo nga leon. Ania na kita sa pagpurong-purong sa piramide. Ania na kita sa Basahon sa Pinadayag, sa kaulahiang kapitulo. Nagaingon ang siyensya nga tulo ka minuto na lang kono kita sa dili pa ang tungang gabii. Oh, hunahunaa lang gyud ninyo kung asa na kita.

²⁴ Ug matikdi, ipananglitan nato ang piramide, masayon ra nia. Ang pagkaporma niini sama ra sa usa ka triyanggulo.

²⁵ Sa dihang atua pa kita niadtong sinugdanan sa kapanahonan sa iglesia, pagkahuman sa Repormasyon niadtong panahon ni Luther, magsulti lang ang usa ka tawo nga siya usa ka Cristohanon, magkahulugan na kadto sa iyang kinabuhi o kamatayon. Patyon nila siya sa pagsulti lang nga siya usa ka Cristohanon. Busa ang pag-agi sa paglutos... Sa matag kapanahonan, sa matag panahon, aduna gyu'y pagpanglutos. "Ang tanan nga nagakinabuhi sa pagkadiosnon diha kang Cristo Jesus magaanus sa mga paglutos." Niadtong panahon ni Luther, makahahadlok nga isulti mo nga "usa ka ka Lutheran." Isipon ka nila nga usa ka panatiko, ug mamahimong patyon ka nila. Daghang mga higayon nga gipangpatay nila sila samtang nakagapos didto sa posteng-sunoganan, gipangsunog, ug tanan na, ang maong mga Lutheran.

²⁶ Dayon migamay ang iglesia, sama sa piramide. Miabot kini ngadto sa usa pa ka hut-ong sa grasya, nga mao ang pagpabalaan. Sa panahon ni Wesley, niadtong nagprotesta siya sa iglesiang Anglikano, nagtudlo siya og pagpabalaan. Midangat na pud kini ngadto sa pagka-minorya, dayon ginatawag na sila nga usa ka pundok sa mga panatiko.

²⁷ Pila man ang ania dinhi nga mga Methodist, o kanhi, o kanhing konektado sa iglesiang Methodist? Katunga sa inyo. Kabalo ba mo nga hapit na unta madawat sa iglesiang Methodist ang Espiritu Santo usa niana ka higayon kaniadto? Nakatambong na ako sa mga simbahang Methodist ug nakasaksi kanilang nangatumba sa salog, ug sabligan pa gani og tubig ang ilang nawong ug ginapaypayan sila og mga pamaypay, ginapugngan ang Espiritu Santo nga mokunsad kanila. Husto kana. Karon, kamatuoran kana, didto mismo sa kabungturan sa Kentucky kon diin may mga Methodist. Kamo dinhi mga miyembro ra sa iglesia. May mga Methodist kami kaniadto didto, ug mga Baptist. Mangluhod kami didto sa altar ug tapikon ang usa'g usa diha sa likod hangtud nga maangkon gyud namo ang usa ka butang. Pagkahuman namo, lahi na ang pagkinabuhi namo human niadto.

28 Pero kamo manganhi lang ug ipalista ang inyong ngalan diha sa libro ug miingon, “Methodist na ako.” Ug kuhaon ang butanganan og asin ug magsablig og gamay’ng tubig sa inyo, ug mao na kana. Mogawas ug magsul-ob og purol, magmek-ap, mosalmot sa mga lumba sa kabayo, magpusta, magsugal, magdula og mga slot machine ug tanan nang uban pa, isipon gihapon nga maayong mga Methodist, kita n’yo. Dili kana Methodist. Kana’y mga nagapamiyembro-miyembro ra sa iglesia. Husto. Ang Baptist, ingon niana gihapon, ang Presbyterian, ang tanan nang uban pa ingon niana gihapon.

29 Sama sa giingon ni David duPlessis, “Mga apo, wala’y mga apo ang Dios.” Wala gyud sukad nagkaaduna og apo ang Dios. Aduna lamang Siya og mga anak, pero wala’y mga apo. Husto kana. Kamo . . . ug ang mga tawong miyembro sa iglesiang Methodist, o iglesiang Pentecostal, o iglesiang Baptist, tungod kay ang inyong inahan o amahan usa man ka Pentecostal o Baptist, kung ingon niana apo kamo. Sila ang mga anak. Apo kamo, kita n’yo. Busa wala gyud og ingon niana ang Dios. Daghan og ingon niana ang iglesia, pero dili—pero dili ang—dili ang—dili . . . wala og ingon niana ang Dios.

30 Bueno, matikdi n’yo kini, nga nanagpadayon hangtud nga miabot kini sa karon, nga midangat na kini sa pagka-minorya, ang iglesia. Dayon miabot ang kapanahonan sa Pentecostal. Nga siguradong maoy nagpatag sa daghang mga buntodbuntod. Dayon unsa ang gibuhát niini? Gibiyaan mismo niini ang Methodist ug Lutheran.

31 Karon nagpadayon na usab palayo ang Balaang Espiritu gikan sa kapanahonan sa Pentecostal. Unsa man diay ang ilang gibuhát? Nag-organisa sila, gihimo ang ilang kaugalingon nga, “Kami ang Assemblies of God.” “Kami’y Oneness.” “Kami’y Twoness.” “Kami’y Church of God.” “Kita ang *ingon-ani*, o *ingon-ana*. Kung dili ka miyembro, dili gyud ka makasulod sa Langit gawas nga nasulat ang imong ngalan sa among libro.” Oh, binuang! Dili ko igsapayan kung Baptist ka man, Methodist, Presbyterian, naisulat ang imong ngalan diha sa Basahon sa Kinabuhì kung gibutang na kini sa Dios didto. Kung gibutan ka nang daan ngadto sa Kinabuhing Wala’y Katapusan, pagatawgon gyud ka sa Dios sa kung unsang paagi, bisan pa man, sa unsa man—sa unsa mang paagi o uban pa. Siguradong tawagon ka Niya. “Ang tanan nga gikahatag Kanako sa Amahan magaari Kanako.” Bisan unsa pa ang gipasakupan mong iglesia, wala kana og kalabotan niini. Pero wala’y unsa mang mabuhát ang denominasyon sa imo, kondili makababag pa gani og daku sa imong pagpadayon nga paglakaw uban sa Dios, mao nga kini’y—wala gyud kini uban pang mabuhát. Tigumon ra mo kauban sa pundok sa mga magtotoo ug di-magtotoo. Siyempre, makahinagbo ka niana bisan asa ka man moadto ug nagkaaduna man gani sila niana didto sa Langit kaniadto. Busa, okey

lang, pero nagalantaw man gud mo sa inyong denominasyon. Paglantaw mo kang Jesus, Siya ang Usa nga angay lantawon.

³² Karon samtang paingon na kita mismo sa... nagkaaduna sila kaniadto og... Pila ba... Nagtoo ko nga gipataas sa niining babaye dinhi ang iyang kamot, nga natun-an mo na ang bahin sa mga piramide. Kabalo mo, wala pa sukad natakluban ang piramide, di ba? Wala pa sukad nataklub ang batong-taklub niini. Wala nila, ni wala man gani makit-i kini. Wala sila mahibalo kung unsa gyud ang nahitabo niini. Ngano man? Nganong wala man ibutang ang batong-pangtaklub niini, ang pangulong-bato, sa ibabaw niini? Tungod kay gisalikway man Siya niadtong mianhi Siya. Siya ang sinalikway nga Bato. Husto kana. Pero matakлубan ra kini. Husto kana. Ug dayon kadtong mga bato nga haum kaayo sa palibot nianang Pangulong-bato, kinahanglan nga mga bato nga mahimong hingpit gayud sama nianang Bato, nga maghaum niini, modugtong ug sa matag—sa tanang dapit. Haum gyud kaayo ang piramide nga dili mo gani mahimong sal-otan og labaha ang sa tunga niini, kon diin magkadugtong ang mga bato niini. Ingon ka maanindot kaayo ang pagkaplastar sa mga bato. Ang uban sa mga niini nagbug-aton og gatusan ka tonelada didto sa bahin sa itaas, ug haum gyud kaayo sa usa'g usa.

³³ Sa ingon niana usab nga paagi gihiusa sa Dios ang Iyang Iglesia. Haum gyud kaayo kitang nabalay, ingon nga usa ra ka kasingkasing ug nagkahiusa. Karon adunay mosulti, “Bueno, ang mga Lutheran kaniadto wala gyu'y nakab-ot.” Ayaw pagtoo niana. Mangbangon usab ang mga Lutheran sa pagkabanhaw sama lang nga ang uban mangbangon didto sa pagkabanhaw. Ang Baptist, ang mga Presbyterian, ug ang tanan nga mga anak sa Dios, mamangon sa nianang pagkabanhaw. Ug mao kana ang hinungdan nga ginaingon sa mga tawo karon, “Oh, bueno, magkaaduna og usa ka halapad nga rebaybal nga magakahitabo dinhi ug magluwas og usa ka gatus ka milyon nga mga Pentecostal. Maluwas silang tanan ug moabot dayon ang Pagsakgaw.” Nasayup ka. Kanang Pagsakgaw mamahimong ginatus ka linibo, husto kana, apan naglangkob pud ang mga niini og unom ka libo ka tuig nga pagluwas usab, sa milabay'ng unom ka libo ka tuig. Nagalakaw ang tawo diha sa Kahayag pag-abot kaniya sa Kahayag, ginatabok niya ang mga tulay pag-abot niya niini. Karon, kung balibaran niya Kini, nan mahibilin siya diha sa kangitngit. Pero kung magpadayon lang gyud siya!

³⁴ Karon, matikdi, dayon ang Pag-anhi ni Ginoong Jesus haduol na kaayo hangtud nga ang Espiritu gikan sa kinasuluran dinhi... nga aduna na halos ang pagpamatarung, pagpabalaan, bautismo sa Balaang Espiritu, ug karon anaa sa panahon na mismo sa pag-anhi sa Pangulong-bato. Ang Iglesia kinahanglan nga mamahimong sama na gayud kang Cristo hangtud nga puede nang mamahimong usa si Cristo ug ang Iglesya, usa

ra ka Espiritu. Ug kung anaa sa imo ang Espiritu ni Cristo, buhaton Niini nga ikinabuhi nimo ang kinabuhi ni Cristo, ilihok ang kinabuhi ni Cristo, buhaton ang mga buhat ni Cristo. “Ang nagatoo Kanako, ang mga buhat nga Akong ginabuhat pagabuhaton usab niya.” Gisulti kana ni Jesus. Kita n’yo? Karon magkaaduna kita, aduna kita’y magaabot nga ministerio nga susama mismo sa kinabuhi ni Cristo. Unsa ba ang ginapaila sa nianang ministerio? Ang Pag-anhi ni Cristo.

³⁵ Tan-awa ninyo kini sa kalibutan karon, ug tan-awa kung unsa ang ginasulti ni Khrushchev, sa tanan niining uban pa nga mga dagkung butang, ug ang grabe nga panagbangi sa tibuok kalibutan nga haduol na nga mamahitabo mismo, sa unsa mang oras, nga mangpulbos na sa unsa mang segundo. Husto kana. Ug kung ingon-ana, nahibalo kita nga haduol na gyud kana. Ang si kinsa man nga may buot nga tawo nga makabasa sa mantalaan o makapaminaw ngadto sa radyo, ug mahibalo gayud nga haduol na kana. Bueno, hinumdumi, moanhi si Cristo para sa Iyang Iglesia sa dili pa kana mahinabo. Busa unsa na ba ka haduol ang Pag-anhi ni Ginoong Jesus? Mahimong sa dili pa mahuman kining tigum karong gabhiona. Ania na kita sa kaulahiang panahon. Tinuod gayud.

³⁶ Matikdi ang iglesia sa iyahang pagkaporma niini, og sa paglihok niini. Hunahunaa lang ninyo mismo kana, kamong mga magsasaysay nga nanagtuon sa kasaysayan. Tan-awa ang iglesiang Lutheran kaniadto ilalum sa pagpamatarung, nga bag-o pa kaayong migawas sa Katolisismo, tan-awa ang paglihok niadto. Dayon tan-awa ang kang Wesley nga medyo mas miduol, ngadto sa pagpabalaan, milaglum pa sa mga Kasulatan. Tan-awa n’yo ang mismong anaa sa tunga, kang Wesley. Dayon ang sunod nga miabot mao ang kapanahonan sa Pentecostal. Ug ang kapanahonan sa Pentecostal pinaagi sa pagpasig-uli sa mga gasa, ang mga gasa nga espirituhanon. Karon, tan-awa ang kapanahonan nga nagapaingon na karon mismo sa Pangulong-bato. Nakita n’yo ba ang buut kong ipasabot? Ang Pag-anhi sa Ginoo, nga napadayag. Ginahulat sa Dios ug sa tanang kabuhatan nga makaplagan sa iglesia ang hustong posisyon niini.

³⁷ Ang problema sa panahon karon, akong. . . medyo ang tanan nga nahimamat ko. Gidala ako kaniadto, kinahanglan namo og. . . kinahanglan man gud nako nga moagi ako og pisikal nga pagsusi, kabalo na mo, kung moadto kami sa gawas-nasud, kamong mga misyonero ug uban pa kabalo na mo niana. Sa dihang gisusi ako gidala nila ako sa lawak didto, gipainom ako sa kung unsang daang. . . sa tan-aw ko mora’g sama sa minasa, o harina, o kung unsa, ug ako—giinom nako kadto. Ug migawas didto, milingkod, mihulat og katunga sa oras ug mihulat kung mogawas ba kadto sa akong tiyan o dili. Milantaw ako sa pikas didto, ug adunay usa ka gamay’ng babaye, nga

mora'g hapit na mamatay. Medyo na siya...gagmay ang mga bitiis ug gagmay ang mga bukton. Ug nagsige ko balhin gikan sa niining lalaki padulong sa niadtong lalaki, gikan na usab niining lalaki padulong niadtong usa pa ka lalaki, paduol nga paduol niadtong babaye, hangtud nga nakaabot ako sa nahimutangan niya. Mora ba'g ang maong makakalolooy'ng babaye hapit na gyud mamatay. Ug nakaduol ako sa iya, ingon ko, "Pasayloa ko, madam."

Miingon siya, "Kumusta ka?" Oh, masakiton gyud kaayo siya!

Ug ingon ko, "Unsa man ang problema?"

³⁸ Miingon siya, "Miadto ako sa Tucson aron duawon ang akong anak nga babaye. Nagmasakiton ako, dili nila matino kung unsa gyu'y problema."

³⁹ Ingon ko, "Usa ra ka butang ang gusto kong ipangutana kanimo." Ingon ko pa, "Usa ako ka magwawali sa Maayong balita. Usa ka ba Cristohanon? Nakaandam ka na ba kung moabot na kana nga takna?"

Ug ingon niya, "Miyembro ako sa *ingon niini-ug-ingon niana* nga iglesia."

⁴⁰ Miingon ko, "Dili man kana ang gipangutana ko kanimo. Usa ba ikaw ka Cristohanon nga puno sa Espiritu sa Dios ug andam na nga mobiya sa dihang pagatawgon ka na Niya?" Ni wala nahibalo ang babaye kung unsa ang ginahisgotan ko. Kita n'yo? Oh, makalolooy gayud sud-ongon ang kahimtang sa kalibutan!

⁴¹ Karon, "gipahibalo nganhi kanato ang mga tinago sa Iyang kabubut-on," ang umalabot nga...Tugoti nga basahon ko sa inyo ang usa ka butang. Nabasa nako didto sa...Ablihon nato karon sa "ang tinago mahitungod sa Iyang kabubut-on." Ablihon nato dinhi usá sa Mga Hebreohanon kadali, ang ika-7 nga kapitulo sa Mga Hebreohanon, kini siguro. Ug gusto kong basahon sa inyo ang usa ka butang nga makapalipay gayud kaninyo sa dihang hunahunaon nato nga magkauban kita nga nagalingkod diha sa Langitnong mga dapit. Mga Hebreohanon, ang ika-7 nga kapitulo.

Kay kini si Melquisedec, (Karon bantayi.) nga hari sa Salem, sacerdote sa labing halangdong Dios,...

⁴² Unsa man ang tinago karon? Ania ang tinago, paminawa kini. Kinsa ba kini nga Tawo, "nga ginabuhát, nahibalo, sa tinago sa Iyang kabubut-on," kining si Melquisedec? Ginahulát ko pa ang tanan dinhi, nagaabli pa gihapon sa mga Biblia. Mga Hebreohanon, ika-7 nga kapitulo, si Pablo nga nagasulti, ang mao rang tawo nga nagsulat sa Mga Taga-Galacia.

Kay kini si Melquisedec, nga hari sa Salem, sacerdote sa labing halangdong Dios,...misugat kang Abraham

sa nagpauli kini gikan sa pagpamatay sa mga hari, ug nanalangin kaniya;

Ug alang kaniya gigahin ni Abraham ang butang, ang ikapulo sa tanang butang; una sa tanan ang hubad, nga sumala sa hubad sa iyang ngalan siya Hari sa katarungan, . . . unya . . . Hari siya sa Salem, (Kinsa ba kining Tawhana?) nga sa ato pa, Hari sa kadaitan;

Siya walay amahan, ni inahan, ni kagikanan, wala usab siya'y sinugdanan sa mga adlaw, o katapusan sa kinabuhi; . . .

⁴³ Kinsa ba kini nga Tawo? Kinsa kaha Siya? Wala Siya'y amahan, wala siya'y inahan, wala Siya'y nahimong Iyang sinugdanan, ni wala'y panahon nga Siya mamatay. Gitagbo Niya si Abraham gikan sa pagpatay sa mga hari. Unsa ba ang gibuhay ni Abraham kaniadto? Miadto siya didto aron bawion si Lot, ang nawala niya nga igsoon, para ibalik siya. Ug gipamatay niya ang mga hari; nga, kadtong gipamatay nga mga hari; siguro mga diyos o kinse ka mga hari, ug ang ilang mga gingharian. Pero giarmasan ni Abraham ang iyang mga sulogoon ug giapas si Lot, mihimulag siya mismo pagkagabii, kita n'yo, niadtong naapsan niya siya sa gabii. Oh, igsoon, nanagtrabaho kita karon sa mangitngit, ang Kahayag lamang nga aduna kita mao ang Kahayag sa Ebanghelyo. Pero mihimulag mismo si Abraham, ug naapsan niya si Lot ug gidala kini balik. Ug sa iyang pagbalik, pagkahuman na mismo sa gubat!

⁴⁴ Moadto kita sa Genesis 14, sa kadali lang, klarohon pa nato ang estorya. Moadto kita dinhi sa Genesis, ang ikaupat- . . . gatoo ko nga anaa kini sa ika-14, sa Genesis 14. Oo, kuhaon nato ang Genesis 14:18, magsugod. Magsugod kita'g gamay sa dili pa kana. Magsugod kita, oo, sa ika-18 nga bersekulo, Genesis 14:18, "Ug si Melquisedec . . ." Karon, si Abraham kana nga mipauli na gikan sa pagpamatay sa mga hari. Mipauli na, nga anaa na sa iyang dalan pauli, nga daladala si Lot pabalik, ang tanan nga mga tawo nga gibihag sa mga hari. Ang tanantanan mismo!

⁴⁵ Sama ni David, nga ming-adto ug gikuha ang . . . Unsa man ang gibuhay ni David? Mikuha og gamay'ng lamboyog, gigukod ug gibawi ang gamay'ng karnero gikan sa baba sa leon. Pamalandonga n'yo nga usa ra ka lamboyog, ang gigamit sa pagluwas sa karnero. Kinsa kaha sa kalibutan ang makabuhay niana? Isulti daw sa ako kung kinsang tawo dinhi ang makabuhay niana, ipataas ang inyong kamot. Isulti nako diretso sa inyo nga sayup kamo. Wala ninyo makita nga gipataas nako ang akong kamot. Dili, dili gyud nako gukdon ang maong leon nga gamit bisan ang thirty-ought-six nga pusil, halos. Pero gigukod niya kadto gamit ang lamboyog, nga usa ra ka pirasong gamay nga panit, nga nakahigot sa duha ka tumoy sa pisi, dayon ipatuyok-tuyok kini ug ihingay. Tungod kay . . . Ug niadtong oras

nga nanghinambog na si Goliath, gisulong niya si Goliath, ug miingon siya, “Gitugot sa Dios nga anaa sa Langit nga luwason ko kaniadto ang usa ka karnero gikan sa baba sa usa ka leon, gikan sa baba sa usa ka oso.” Kabalo siya nga dili kadto tungod sa lamboyog. Tungod kadto sa gahum sa Dios nga mikunsad diha kaniya. Ang Dios ang Maoy nagdala pabalik sa karnero.

⁴⁶ Ug mao kana ang ginaingon nato karon. Aduna ang Dios og mga David nga anaa lang sa palibot, oo sir, nga nagapakaon sa mga karnero nga iya sa Amahan. Ug usahay pag may moabot nga tumor, o may moabot nga kanser, o kung unsa man, ug miipsot gikan sa mga kamot sa doktor. Dili kana makapapugong sa nianang David, gukdon niya mismo kana nga butang, gamit ang gamay’ng lamboyog, og, “Mangayo kamo og bisan unsa pinaagi sa Akong Ngalan, igahatag kini.” Dili ko igsapayan, mokatawa man ang mga doktor, ug katawa-an man siya sa tanang uban pa, gukdon gihapon niya kini bisan pa man, dalhon ang maong karnero pabalik ngadto sa panon. Oo, sir. “Anak siya sa Dios, buhian mo siya!” Gitumba niya kadtong leon, dayon mibangon ang leon, gilagnot niya kini sa balbas ug gipatay kini; usa ra ka gamayong mapulapula nga batang lalaki, nga mitimbang lang siguro og otsenta o nubenta ka libra.

⁴⁷ Tan-awa ninyo. Si Melquisedec, ang Hari sa Salem nga mao ang Hari sa Pakigdait, nga sa pagkatinuod ang Salem atua ra tabok sa bungtod. Ang Hari kadto sa Jerusalem, maoy kung Kinsa Siya. Eksaktong Siya kadto, ang Hari sa Jerusalem. Nga, ang Jerusalem ang unang tawag niini Salem, nga nagkahulogan og pagpakigdait; ingon niadto ang unang Jerusalem, sa wala pa kadto gitawag nga Jerusalem. Siya ang Hari sa Jerusalem. Siya ang Hari sa pagkamatarung, ang Hari sa pakigdait, ang Hari sa Salem. Wala Siya’y amahan, wala Siya’y inahan, wala Siya’y sinugdanan sa mga adlaw, wala Siya’y katapusan sa kinabuhi, wala Siya og ilhanan sa kaliwat. Oh, oh, oh! Kinsa ba kini nga Tawo? Matikdi ninyo Siya. Pagkahuman sa gubat, human nga naangkon na ang kadaugan, matikdi n’yo kung unsa ang Iyang gisulti. “Ug si Melquisedec,” sa ika-18 nga bersekulo, sa ika-14 nga kapitulo, sa Genesis.

Ug si Melquisedec nga hari sa Salem mikuha og tinapay ug vino: ug siya mao ang sacerdote sa labing labaw nga Dios.

Ug siya gipanalanginan niya, ug miingon, Dalayegon si Abram sa labing labaw nga Dios, nga tag-iya sa mga langit ug yuta:

Ug dalayegon ang labing labaw nga Dios, nga naghatag sa imong mga kaaway sa imong mga kamot. Ug gihatagan niya siya og kapulo sa tanan.

⁴⁸ Atong padayonon sa pagbasa og gamay sa unahan.

Ug unya ang hari sa Sodoma miingon kang Abraham, Ihatag mo kanako ang mga tawo, ug kuhaa alang kanimo ang bahandi.

Ug mitubag si Abram ngadto sa hari sa Sodoma, Gibayaw ko ang akong kamot sa GINOO, ang labing labaw nga Dios, nga tag-iya sa mga langit ug sa yuta, (Paminawa ninyo kung giunsa niya pagpamubo niana, hum, kung giunsa niya sa paghatag niini ngadto kaniya!)

Nga ako dili mokuha bisan sa usa ka lugas nga hilo ni sa usa ka higot-sa-sapin, ug nga ako dili mokuha bisan unsang mga butang, dili sa bisan unsang mga butang nga...ug aron ikaw dili makaingon, ug nga sa mga imo, basin ikaw unya moingon, ako ang nagpadato kang Abram:

Gawas kadto lamang gipangaon sa mga batan-on, . . .

⁴⁹ Matikdi n'yo kini si Melquisedec sa pagkahinagbo Niya kang Abraham nga gikan pa niadto sa pagpamatay sa mga hari. Ang tinago sa Dios nga ginapadayag niadtong higayona! Kinsa ba Siya? Wala ni kinsa man. . . Wala sila'y makaplagan nga unsa mang kasaysayan mahitungod Kaniya, tungod kay wala man Siya og unsa mang amahan, wala man Siya og unsa mang inahan, wala Siya'y unsa mang panahon nga Siya nagsugod, wala Siya'y unsa mang panahon nga Siya mamatay, busa kung Kinsa man Siya buhi Siya sa gihapon. Wala gyud Siya sukad nagkaaduna og sinugdanan, busa dili gyud Siya mahimong uban pa kondili si El, Elah, Elohim; nagalungtad-nga-nag-inusara, nagapabilin nga nag-inusara, Makagagahum nga Dios!

⁵⁰ Si Jesus adunay Amahan, si Jesus adunay inahan; si Jesus adunay sinugdanan sa mga adlaw, si Jesus adunay katapusan sa yutan-ong kinabuhi. Pero kini nga Tawo wala'y amahan ni inahan, amen, wala'y amahan ni inahan. Si Jesus parehong adunay Amahan ug inahan. Pero kini nga Tawo wala'y amahan ni inahan. Amen. Ug unsa man ang gibuhat Niya, pagkahuman na sa gubat, pagkahuman nga mipahimutang na si Abraham sa iyang posisyon?

⁵¹ Pagkahuman nga mipahiluna na sa Iyahan posisyon ang Iglesia, gitawag kita sa pagkasinagop ingon nga mga anak, pinaagi sa Balaang Espiritu. Ug sa dihang mopahiluna na ang matag tawo sa iyang posisyon, sa kung para asa siya gitawag sa Dios, ug magpabilin hangtud sa kinatумыan sa dalan, nga nagasangyaw para sa mga nangawala.

⁵² Una, gitangtang ni Pablo ang tanan nga kahadlok niini, busa karon, "Kung tinawag gyud ka, kung dili ka basta na lang nadala sa imong panghunahuna sa kung unsang matang sa teolohiya, kung tinuod gyud nga gipakatawo ka sa Espiritu, kung ingon-ana gipili-nang-daan ka sa Dios sa wala pa

ang pagkatukod sa kalibutan, gisulat na ang imong ngalan diha sa Basahon sa Kinabuhi nga iya sa Cordero, ug karon nanagkatigum kita aron manggilingkod sa Langitnong mga dapit diha kang Cristo Jesus. Usa ka balaang katawhan, usa ka balaang nasud, usa ka pinasahi nga katawhan, harianong pagkasaserdote, nga nanaghalad og mga espirituhanong halad ngadto sa Dios, nga, ang mga bunga sa atong mga ngabil nagahatag og mga pagdalayeg ngadto sa Iyang Ngalan.”

⁵³ Manambong ang mga tawo ug moingon, “Mga buang-buang kana sila.” Ingon niana bitaw sila; ang kaalam man gud sa Dios kabuangan ngadto sa tawo, ug ang kaalam sa tawo kabuangan pud sa Dios. Magkasumpaki gyud sila, sa usa’g usa.

⁵⁴ Apan ang usa ka tinuod nga iglesia nga puno-sa-Espiritu, nga puno sa gahum sa Dios, magkauban nga nagalingkod diha sa Langitnong mga dapit, nga nanaghalad og mga espirituhanong halad, mga pagdalayeg sa Dios, nga nagapanglihok ang Balaang Espiritu sa ilang taliwala, nagapang-ila sa sala ug ginapangsaway ang mga butang nga anaa sa ilang taliwala nga sayup, ginapangtul-id ug ginapangpatag ug ginahan-ay. Tungod kay ngano man? Tungod diha sa Presensiya sa Dios anaa kanunay ang maong nagkadugo nga Halad.

⁵⁵ Karon hinumdumi, nahisgotan na nato kini kaganinang buntag. Wala kamo naluwas pinaagi sa Dugo, *gipapadayon* kamong luwas tungod sa Dugo. Pero naluwas kamo tungod sa grasya, pinaagi sa pagtoo, nga ginatoohan Kini. Nanuktok sa imong kasingkasing ang Dios tungod kay gipili ka na Niyang daan. Mihangad ka ug mitoo niini, midawat niini. Karon ang Dugo mao ang nagabayad sa sala. Hinumdumi, miingon ako, “Wala ginahukman sa Dios ang makasasala sa pagbuhat niya sa kasal-anan.” Tungod nga makasasala na siya sa sugod pa lang. Ginahukman Niya ang usa ka Cristohanon sa pagbuhat niya og kasal-anan. Ug dayon tungod nga gihukman man Niya kini, gikuha ni Cristo ang maong pagkahinukman. Busa wala na’y pagkahinukman pa kanila nga mga anaa na kang Cristo Jesus, nga wala maglakaw uyon sa unod, kondili uyon sa Espiritu. Ug kung makabuhat ka man og bisan unsang sayup, dili kini tinuyo. Wala ka magpakasala nga tinuyo. Ang usa ka tawo nga nagapakasala sa tinuyo, nga moadto ug magpakasala sa tinuyo, wala pa gyud siya nakasulod nianang Lawas. Apan pag ang usa ka tawo nakasulod na niana, patay na siya, ug natago na ang iyang kinabuhi diha sa Dios, pinaagi kang Cristo, nga selyado na sa Espiritu Santo, ug dili na siya makaplagan sa yawa, atua na siya sa pinakatagong bahin. Kinahanglan niya usá mogawas niana sa dili pa makaduol kaniya ang yawa. “Kay patay ka na man gud!”

⁵⁶ Sultihi n’yo ang usa ka patay na nga tawo nga siya’y usa ka tigpakaaron-ingnon ug tan-awa kung unsa ang mahinabo. Sipaa siya sa kilid ug sultihi, “Ikaw nga dugay na nga tigpakaaron-

ingnon, ikaw,” dili siya magsulti og unsa man. Ug husto kana, magpuyo lang siya dinha.

⁵⁷ Ug ang usa ka tawo nga patay na diha kang Cristo, tawagon mo man siyang tigpakaaron-ingnon, tawagon mo man siya og bisan unsa nga gusto mo, dili gyud niya tumpangan kana. Kung duna man siya’y buhaton, moikyas siya paingon sa kung asa man ug iampo ka niya. Husto kana. Pero, oh, ang uban kanila buhi pa kaayo. Mao kana ang akong gihunahuna, patay na man kaha nga mga tawo nga atong gipanglubong. Sila nga mga patay na diha kang Cristo, ginalubong man nato sila diha sa tubig. Usahay daghan kaayo ang atong ginapanglubong nga mga buhi pa kaayo, daghan pa kaayong pagpanghimaraut ug pagpalabawlabaw, ug daghan pa kaayo og mga niana sulod sa iglesia. Apan dili nato mahimong ihimulag kana, pero mahimo sa Dios. Nasayod Siya sa Iyang katawhan. Nasayod Siya sa Iyang mga karnero. Nasayod Siya sa matag tingog. Nasayod Siya sa Iyang mga anak. Nasayod Siya kung kinsa ang mahimo Niyang tawgon, nasayod Siya kung kinsa ang Iyang mga gipili-nang-daan. Nasayod Siya kung kang kinsa Niya ginahatag ang mga niining butang, kung kang kinsa Niya ginapaila ang Iyang Kaugalingon. Kung sa unsang paagi Niya . . . Mahimong mosalig ang Dios sa Iyang mga anak, sa kung unsay buhaton, ingon nga nahibalo nga pagabuhaton gyud nila sa eksakto.

⁵⁸ Nagatoo ba kamo nga ginabuhat kana sa Dios? Aba, miingon si Satanas kang—kang Job usa niana ka adlaw . . . miingon ngadto sa Dios usa niana ka adlaw, “Oo bitaw, aduna Ka og usa ka alagad.”

⁵⁹ Miingon ang Dios, “Wala ma’y susama kaniya sa yuta. Usa siya ka tawo nga hingpit.” May pagsalig Siya kaniya.

⁶⁰ Miingon si satanas, “Oh, oo, dali ra man gud kaniya ang tanang butang. Itugyan gani siya kanako sa diyutay’ng panahon ug himoon kong tunglohon Ka niya sa Imong atubangan.”

⁶¹ Miingon Siya, “Anaa na siya sa imong mga kamot, apan ayaw gayud kuhaa ang iyang kinabuhi.” Kita n’yo? Ug gibuhat gayud ni satanas ang tanang butang gawas lamang sa pagkuha sa kinabuhi ni Job.

⁶² Apan, oh, si Job, imbes nga . . . unsa ma’y iyang gibuhat? Gitunglo ba niya ang Dios niadtong gikuha sa Dios ang iyang mga anak, sa dihang gibuhat ni Satanas ang tanang kadautang butang ngadto kang Job, ug tanan na? Wala gyud gikuwestiyon ni Job. Mihapa siya ug misimba na hinoon. Alleluyah! Miingon, “Ang Ginoo ang mihatag ug ang Ginoo ang mikuha, bulahan ang Ngalan sa Ginoo!” Tan-awa.

⁶³ Kabalo gyud ang Dios sa Iyang pagsalig kang Job. Kabalo ang Dios kung unsa ka daku ang Iyang pagsalig kanimo. Kabalo Siya kung unsa ka daku ang Iyang pagsalig kanako. Apan ang

ginahisgotan nato karon mao ang pagpahiluna sa niining anak diha sa hustong puwesto niini.

⁶⁴ Karon, pag ang Biblia...Sa dihang human na ang pagpakiggubat, sa dihang human na ang tanantanan, nan unsa man ang sunod nga butang nga pagabuhaton nato? Unsa man ang butang nga pagabuhaton nato pagkahuman sa gubat? Kabalo ba mo kung unsa ang pagabuhaton nato? Tagboon nato si Melquisedec. Ablihan nato ang Mateo 16:16, kadali, tan-awon nato kung husto ba kana o dili. San Mateo, ika-16 nga kapitulo ug ika-16 nga bersekulo. Sigurado ko nga husto kana, Mateo 16:16. Mateo sais-...Dili, sayup diay kana, dili mahimong ingon niana ka duol. 26:26. Oh, dinhi sa 16, nakigsulti Siya ngadto kang Simon Pedro; pasayloa ko, dili ko tuyo nga isulti kana. 26:26, tungod nga sa katapusan na kana nga panihapon, kana ang gipaningkamotan kong makita. Mateo, sa ika-26 nga kapitulo ug ang ika-26 nga bersekulo. Karon nakita na nato, ania na, ang katapusang panihapon.

Ug sa nagakaon sila, gikuptan ni Jesus ang usa ka tinapay, ug gipanalanginan niya, ug iyang gitipiktipik, ug gihatag sa Iyang mga tinun-an, ug nagaingon, Kumuha kamo, kumaon kamo; kini mao ang akong lawas.

Ug sa gikuptan niya ang copa, ug nagpasalamat, ug iyang gihatag kanila, nga nagaingon, Uminom kamo nga tanan niini;

Kay kini mao ang akong dugo sa bag-o nga tugon, nga pagaulaon tungod sa daghan alang sa pagpasaylo sa mga sala (m-g-a s-a-l-a, mga sala, mga Cristohanon nga nakabuhat og mga sayup nga butang).

⁶⁵ Sige, “Apan—apan...” Paminaw, sa ika 29 nga bersekulo.

...ako nagaingon kaninyo, nga gikan karon dili na ako magainom sa niining bunga sa parras, hangtud niadtong adlawa nga magainom ako pag-usab bag-o kauban ninyo sa gingharian sa akong Amahan.

⁶⁶ Unsa? Pareho pud kini sa gibuhat ni Melquisedec pagkahuman nga maangkon ni Abraham ang iyang posisyon. Gihan-ay para sa gubat ang iyang mga tawo, ug gidaug ang gubat, ug mipauli na, ug misugat didto si Melquisedec nga may dalang tinapay ug vino. Pagkahuman sa gubat, mangaon kita didto sa Pang-kasal nga Panihapon uban ang Ginoong Jesus sa bag-ong kalibutan. Oh, bulahan ang Ngalan sa Ginoo. Sige.

⁶⁷ “Ang mga tinago mahitungod sa Iyang kabubut-on, sumala sa Iyang maayo nga katuyoan,” balik na usab sa Mga Taga-Efeso, 9, “nga Iyang gituyo diha Kaniya.”

Alang sa usa ka hugna sa kahupnganan sa panahon...

68 Ug hinumdomi nga, bag-ohay lang nato kana naagian. Mga Taga-Efeso, unang kapitulo, ika-10 nga bersekulo.

Alang sa usa ka hugna sa kahupnganan sa panahon . . .

69 Karon, nakat-onan nato nga ang kahupnganan sa panahon nagapaabot para sa unsa? Ang kahupnganan sa tibuok panahon, ang panahon kon diin ang sala matapos na, ang panahon nga ang kamatayon matapos na, ang panahon nga ang sakit matapos na, ang panahon nga ang sala matapos na, ang panahon nga ang tanang mga pagtuis (kadtong mga butang nga gituis, nga gituis sa yawa) matapos na, sa diha ang oras mismo matapos na. Bantayi.

Alang sa usa ka hugna sa kahupnganan sa panahon nga iyang pagatigumon . . . ang tanan nga mga butang diha kang Cristo, ang mga butang nga anaa sa langit, ug ang mga butang nga anaa sa yuta; diha kaniya:

70 “Tigumon ang tanang mga butang pinaagi ni Cristo.” Maingon sa gikaingon ko na kaganinang buntag, ang tanang mga gagmay’ng mahinungdanong butang nga makaplagan nato, kining mga halangdon nga gagmay’ng mga butang, mahimo ninyo pasinawon ang mga niini sa Genesis, mahimo ninyo pasinawon ang mga niini diha sa Exodo, mahimo ninyo pasinawon ang mga niini diha sa Levitico, ug subayon ang mga niini hangtud sa katapusan, ug hangtud diha sa Pinadayag mopahinungod kining tanan kang Jesus. Paghisgotan mo si Joseph, hisgotan mo si Abraham, hisgotan mo si Isaac, hisgotan mo si Jacob, hisgotan mo si David, hisgotan mo ang unsa mang niining mahinungdanong mga butang, ang maong mga tawo sa Dios, ug tan-awa kung dili ba ninyo makita si Jesus Cristo nga naipasundayag diha sa matag usa kanila. “Aron Iyang tigumon ang tanang butang sa Usa ra, kang Cristo Jesus.”

71 Karon, sa pagpadayon nato og gamay sa unahan, sa ika-11 nga bersekulo karon.

Nga diha usab nahimo kita nga usa ka panulondon, . . .

72 Oh, “usa ka panulondon.” Kinahanglan may mag-bilin sa imo og usa ka butang, aron panulondon. Husto ba kana? Usa ka panulondon! Unsa ba ang panulondon nga aduna kita? Unsa ba ang panulondon ko? Wala man ko’y bisan unsa. Apan nagbilin ang Dios kanako og usa ka panulondon sa dihang gibutang Niya ang akong ngalan sa Basahon sa Kinabuhi nga iya sa Cordero sa wala pa ang pagkatukod sa kalibutan.

73 Oh, moingon mo, “Karon, kadali lang, igsoon, gibuhat man kana ni Jesus niadtong namatay Siya para kanimo.” Wala, wala Niya kana sukad gibuhat. Miabot si Jesus aron lukaton kana nga panulondon nga para kanimo. Basaha ang sunod mismo gyu- . . . sunod mismo nga linya.

Nga diha kita usab nahimo nga dayag nga . . . nahimo kita nga usa ka panulondon, kita gibut-an-nang-daan sumala sa katuyoan niya nga nagpalihok sa tanang mga butang sumala sa laraw sa iyang mismong maayong kabubut-on:

⁷⁴ Ang Dios, sa wala pa ang pagkatukod sa kalibutan, sama sa gihisgotan na nato sa pagtuon, kamong mga tawo, kung unsa nga nakita mismo nato nga ang Dios nagalungtad-sa-Iyara-Kaugalingon, kung unsa nga diha mismo Kaniya gugma. Diha mismo Kaniya ang kinaiyahan nga mamahimong Dios; wala pa ni unsa man kaniadto nga magsimba Kaniya. Diha Kaniya anaa na ang pagka-Amahan; adunay . . . Siya'y igo na sa Iya ra Kaugalingon. Diha Kaniya anaa na ang pagka-Manluluwas; wala pa man kaniadto may nawala. Diha Kaniya anaa na ang pagka-Mananambal. Mao kana ang mga kinaiyahan Niya. Pero wala pa man og bisan unsa kaniadto. Busa ang Iyang Kaugalingon Mismo, ang Iyang Kaugalingong maayong kabubut-on ang nagpagawas sa niining mga butang, aron Siya pinaagi sa niining usa ka Tawo, si Cristo Jesus, tigumon kining tanan pag-usab. Oh! “Wala makita sa mata, wala hidunggi . . .” Dili ikatingala nga kini usa ka kahibulongang butang!

⁷⁵ Tan-awa, “mga gipili-nang-daan kita ngadto niining panulondon.” Kung ako ang hustong manununod sa usa ka butang, kung nagapanuktok ang Dios sa akong kasingkasing ug nagaingon, “William Branham, gitawag Ko ikaw sa kaniadto pang panahon, sa wala pa ang pagkatukod sa kalibutan, aron iwali ang Maayong Balita,” Aduna ako og panulondon, usa ka panulondon nga Kinabuhing Walay Katapusan. Karon, gipadala sa Dios si Jesus aron himoong realidad kana nga panulondon ngari kanako, tungod kay wala man ako'y mahimo para—para mapanunod kini. Blangko kini, balido mismo kini, wala gyud ko'y nahimo aron mapanunod kini. Apan sa kahupnganan sa panahon gipadala sa Dios, sa Iya Mismong hustong panahon, si Jesus nga Cordero, nga gipatay sa wala pa ang pagkatukod sa kalibutan. Ang Dugo Niya giula aron mopaingon ako sa akong panulondon. Para mamahimong unsa? Unsa nga panulondon? Ang pagka-anak, aron mahimong anak sa Dios.

⁷⁶ Ug karon basin matuk-an kamo Niini hangtud nga dili na makaginhawa. Apan kabalo ba mo nga ang mga tawong anak sa Dios maoy mga gagmay'ng dios? Pila na sa inyo ang nakabalo niana? Pila na sa inyo ang nakabalo nga giingon kana ni Jesus? Ang Biblia, si Jesus nagsulti, “Dili ba ang inyong balaod nag-ingon, mismo, nga kamo ‘mga dios’? Ug kung ginatawag ninyo sila nga mga dios. . .” Nga, gisulti sa Dios diha sa Genesis 2 nga sila mga dios, tungod kay sila, may bug-os nga kagahum sa pagdumala sa kalibutan. Gihatagan Niya siya og pagpanggahum sa tanang butang. Ug naiwala niya ang iyang gamay'ng pagka-dios, naiwala niya ang iyang pagka-anak, naiwala niya ang

iyang paggahum, ug napaingon kini kang Satanas. Pero, igsoon, ginapaabot nato ang pagkapinadayag sa mga anak sa Dios nga mobalik ug pagadumalahan kini pag-usab. Ginahulat ang kahupnganan sa panahon, sa dihang moabot na ang piramide sa kinaibabwan niini, sa dihang ang bug-os nga mga anak sa Dios mapadayag na, sa diha ang gahum sa Dios moadto na (alleluyah) ug bawion ang matag gahum nga giilog ni Satanas gikan kaniya. Oo, sir, iyaha man gud kini.

⁷⁷ Siya ang Logos nga migula gikan sa Dios, tinuod kana, mao kadto ang Anak sa Dios. Dayon gibuhat Niya ang tawo nga gamay'ng dios. Ug miingon Siya, "Kung ilang ginatawag kadtong mga giabtan og Pulong sa Dios, silang mga manalagna, kung ginatawag nila sila nga 'mga dios' silang mga ginaabtan og Pulong sa Dios. . . ." Ug ingon niana ang gisulti sa Dios, Mismo, nga sila mga dios. Gisultihan Niya si Moises, "Gihimo Ko ikaw nga usa ka dios, ug gihimo si Aaron nga imong manalagna." Amen. Whew! Nagalihok man ako nga mora'g relihiyosong sapoton, pero dili ako ingon niana. Oh, kung maablihan lang unta ang inyong mga mata ug makita kanang mga butanga. Sige. Gihimo Niya ang tawo nga usa ka dios, usa ka dios diha sa iyang ginsakupan. Ug ang iyang ginsakupan moabot gikan sa dagat hangtud sa pikas dagat, gikan sa baybay hangtud sa pikas baybayon; anaa kaniya ang kamandoan niini.

⁷⁸ Ug niadtong miabot si Jesus, ingon nga ang Nag-inusara nga Dios nga walay sala, gipamatud-an Niya kini. Sa dihang mihaguros ang mga hangin, miingon Siya, "Humillum, humunong ka!" Amen. Ug didto niadtong kahoy, miingon Siya, "Wala na'y tawo nga magakaon gikan kanimo."

⁷⁹ "Sa pagkatinuod, magaingon Ako kaninyo, kamo nga mga gagmay'ng dios, kung isulti ninyo sa niining bukid, 'Bumalhin ka,' ug dili magduhaduha sulod sa inyong kasingkasing, kondili toohan nga ang gisulti ninyo mahinabo, maangkon ninyo kung unsa ang inyong gisulti."

⁸⁰ Balikan ninyo mismo sa Genesis, sa orihinal, kung unsa kini? Karon ang kalibutan ug ang kinaiyahan nanag-agulo na, nanagtuaw, ang tanan nagapaingon na. Sa unsa? Para sa pagkapinadayag sa anak sa Dios, sa diha nga ang tinuod nga mga anak, natawo na pag-usab nga mga anak, mga gipuno na nga mga anak nagasulti ug ang ilang pulong ginapamatud-an mismo. Nagatoo ko nga anaa na kita karon sa utlanan paingon niini. Oo, sir. Isulti n'yo lang sa niining bukid, mahinabo mismo kini.

⁸¹ "Igsoon, ako—nagapangandoy ako og *ingon niana-ug-ingon niini*, nga duna unta'y mabuhat nga usa ka butang. Usa ako ka magtotoo kang Jesus Cristo."

⁸² "Ginahatag ko kini kanimo sa Ngalan ni Ginoong Jesus Cristo." Amen. Aduna dayon og manipestasyon.

83 “Oh, igsoon, masunog na ang mga tanum ko didto. Dugay na nga wala’y ulan.”

84 “Ipadala ko sa imo ang ulan, sa Ngalan sa Ginoo.” Dayon taudtaud miulan. Oh, nagahulat, nagaagulo, ang tibuok kinaiyahan nagahulat sa pagkapinadayag sa mga anak sa Dios. Giordenar na kini sa Dios didto pa sa sinugdanan. Gihatagan Niya ang tawo og kamandoan.

85 Gihatag Niya kang Jesus Cristo, ug gihatag pud ni Jesus diha sa Iyang Ngalan, kauban niining kasiguradohan, “Pangayo kamo sa Amahan og bisan unsa sa Akong Ngalan ug pagabuhaton Ko kini.” Oh, Igsoong Palmer! Nagahulat na lang sa pagkapinadayag sa mga anak sa Dios, nga mai-posisyon, ang Iglesia!

86 Sama sa giingon ko na, ang Basahon sa Mga Taga-Efeso mao ang Basahon ni Josue, ug gipahiluna ni Josue ang mga tawo kaniadto kung asa sila angay ipahimutang. Karon, kung dili sila magpabilin, ug unsa ibutang niya si Ephraim *dinhi*, ug dinhi sa yuta ni Manases, ug mobalik *kining* usa nga magreklamo ug makiglalis, unsaon nila pagpuyo nga may pagsinabtanay? kung ang usa moingon, “Baptist ako, Methodist ako, Pentecostal ako, Oneness ako, Twoness ako, *Ingon niini-ug-ingon niana* ako.”

87 Unsaon man nimo pagbuhat niana? Magpabilin lang! Gusto sa Dios nga iposisyon na ang Iyang Iglesia, ang mga anak nga lalaki ug mga anak nga babaye sa Dios. Dios, tugoti nga maabtan ko pa nga makita kana, mao kana ang akong pag-ampo. Haduol na kaayo hangtud nga medyo mabati ko na kini sa akong mga kamot, halos. Halos ania na kini. Mao kana ang gipangandoy ko nga makita, nagahulat sa panahon kon diin magalakaw kita sa dalan, dayon dunay naghigda didto nga usa ka bakol, nga ingon na niana sa tagoangkan pa lang sa iyang inahan, “Salapi ug bulawan wala ako.” Oh, nagahulat na lang gayud sa pagkapadayag sa anak sa Dios, alleluyah, kon diin ipadayag na sa Dios ang Iyang Kaugalingon, kon diin pahunongon na nila ang sakit, pahunongon na nila ang kanser, pahunongon na nila ang mga balatian.

88 Sa hunahuna n’yo ba grabe na ang kanser? Miingon ang Biblia nga moabot ang panahon kon diin mangadugta ang mga tawo sa ilang unod mismo, ug kaonon na sa mga buitre ang ilang mga lawas sa dili pa sila gani mamatay. Ang kanser mamahimong usa na lang ka sakit sa ngipon kompara sa kung unsa ang nagasingabot. Pero, hinumdumi, kanang makalilisang nga sakit gidid-an nianang panahona nga hilabtan kadtong mga aduna na’y Selyo sa Dios. Mao kana kung unsa ang gipaningkamotan nato karon, ang makasulod ug maiposisyon na sa Gingharian sa Dios sa dili pa moigo kining makalilisang nga mga hampak. Oh, pagka-maanindot! Ang hugna sa panahon, ang kahupnganan sa panahon, ang panulondon.

Nga diha nato usab...nahimong...panulondon, sa mga gipili kitang daan...

⁸⁹ Giunsa ba paghatag sa ato ang atong panulondon, pinaagi sa unsa? Pagpili-nang-daan. Ang pagpili-nang-daan mao ang pagkahibalo-nang-daan. Giunsa man paghibalo sa Dios nga masaligan ka Niya nga mamahimong usa ka magwawali? Pinaagi sa Iyang pagkahibalo-nang-daan. “Dili sa kabubut-on sa tawo ni sa iyang paningkamot, o sa iyang...Kondili sa kalooy Dios.” Husto kana, pagpili-nang-daan. Kabalo na Siya kung unsa ang anaa sa imo. Kabalo na Siya kung unsa ang anaa sa imo sa wala ka pa moabot sa kalibutan. Kabalo na Siya kung unsa ang anaa sa imo wala pa nagkaaduna og yuta nga pagaanhian mo. Ingon niana—ingon niana Siya. Ingon niana ang walay-kinutuban nga Dios, ang walay-kinutuban. Kita may-kinutuban, may-kinutuban lamang ang atong panghunahuna.

⁹⁰ Nahimo kining grabe ka mahinungdanon para kanako, sukad nga nahitabo kini kanako. Wala ko kahibalo. Sa dihang nahunahuna ko kini, niadtong nagtindog ako didto sulod sa pipila ka malipayong mga higayon, ug nahunahuna ko, “Wala na’y ugma.” Wala na’y kagahapon, wala na’y sakit, wala na’y kasubo. Wala na’y ginagmay lang nga kalipay, kondili dinagku mismo nga kalipay; puro kalipay. Oh, grabe! Oh, sa pagtindog ko didto ug miingon ko, “Unsa kaha kini?”

⁹¹ Miingon kadtong Tingog, “Kini ang hingpit nga gugma, ug ang tanan nga imong gihigugma ug ang tanan nga naghigugma sa imo ania dinhi uban kanimo karon.”

⁹² “Ug igapresentar mo kami ngadto kang Ginoong Jesus pag-abot Niya, ingon nga mga tropeo sa imong ministerio.” Nakita ko ang matahum nga mga kababayan-an nga atua didto, tanan nanaghangop kanako ug nanaghugyaw, “Among bililhon, pinanggang igsoon!” Nakita ko kadtong mga kalalaken-an nga nakabuhayhay ang buhok hangtud sa ilang liog, nga nagadagan, ginahangop ako ug nanag-ingon, “Among pinanggang igsoon!”

Ug nahunahuna ko, “Unsa ma’y pasabot niini?”

Miingon siya, “Mga katawhan mo sila.”

⁹³ Ingon ko, “Mga paryente ko? Dili mahimong magkaaduna og ingon niana ka daghan ang mga Branham, nga mga milyon-milyon na.”

⁹⁴ Miingon siya, “Mga kinabig mo sila!” Alleluyah! “Mga kinabig mo sila. Sila ang mga...” Miingon, “Nakita mo ba kanang usa nga nagtindog didto?” Ang pinakamatahum nga babayeng nakita ko sukad. Miingon, “Sobra nubenta anyos na siya niadtong nakabig mo siya ngadto sa Dios. Dili ikatingala nga nagasinggit siya’g, ‘Akong pinanggang igsoon.’” Miingon, “Dili na gyud siya matigulang pa. Nalabang na niya kana. Anaa na siya sa kausbongan sa pagkabatan-on. Nagtindog siya dinha. Dili na siya moinum og bugnaw nga tubig, dili na niya

kinahanglan kana. Dili na siya magahigda ug matulog, tungod kay dili na siya kapuyon. Wala na'y ugma, ni kagahapon, wala na'y mga ingon niana. Ania na kami sa Eternidad. Apan usa niana ka mahimayaong adlaw moabot ang Anak sa Dios, ug pagahukman ikaw sumala sa Pulong nga imong giwali ngadto kanila." Oh, igsoon!

Ingon ko, "Kinahanglan ba nga igapresentar usab ni Pablo ang iyang pundok?"

"Oo, sir."

⁹⁵ Ingong ko, "Giwali ko Kini kung unsa lang gyud ang pagkasulti Niini ni Pablo. Wala gyud ako motipas, wala gyud ako nagdala og unsa man nga pang-simbahang mga kredito o tanang uban pa. Nagpabilin lang ako sa gihapon."

⁹⁶ Ug silang tanan nanagsinggit usa usa ra ka tingog, "Kabalo kami niana! Nagasalig kami nga may kasiguradohan." Miingon, "Igapresentar mo kami ngadto Kaniya, ug dayon kitang tanan mamalik sa yuta pag-usab, aron magkinabuhi hangtud sa kahangturan." Oh, grabe!

⁹⁷ Niadtong mga orasa hinayhinay na akong nagabalik. Pagtan-aw ko, atua ako nga nagahigda sa higdaanan, ug nakita ko ang tigulang kong lawas didto nga nagkatigulang ug nangunot na, ug bakó na ug—ug may mga sakit ug nagbalatian na, ug nakita ko ang mga kamot sa likod sa akong ulo, ug nahunahuna ko, "Oh, kinahanglan ko pa ba nga mobalik nianang luwasa pag-usab?"

⁹⁸ Ug padayon kong nadungog kadtong Tingog, "Magpadayon ka! Magpadayon ka!"

⁹⁹ Ingong ko, "Ginoo, kaniadto pa man nagatoo na ako sa Balaanong pagpang-ayo, padayon kong ginatoohan kana. Apan magpadayon ako para sa nianang mga kalag, busa tabangi ako. Magkaaduna ako og daghan didto nga akong. . . Tugoti ako nga mabuhì pa, Ginoo, ug magpadala ako og usa pa ka milyon didto, kung tugotan Mo pa akong mabuhì."

¹⁰⁰ Dili ko igsapayan kung unsa man nga kolor, kredito, ang nasyonalidad, kung unsa man sila, silang tanan pare-pareho ra pag-abot nila didto, ug ingon nianang mga linya sa pagkalahi-lahi wala na. Oh, makita ko kadtong mga kababayan-an, maanyag kaayo; nga wala ko pa nakita sukad. . . nga pabuhayhay, og hatag-as ang buhok paubos diha sa ilang likod. Tag-as og gasagayad nga mga sayal. Nakatiniil sila. Nakita ko ang mga kalalaken-an nga buhayhay ang mga buhok hangtud sa ilang liog, dunay pula ang buhok, dunay itum ang buhok, ug tanang nagkalainlaing mga kolor. Ug gihangop nila ako. Mabati ko mismo sila. Mabati ko ang ilang mga kamot. Ang Dios ang akong Maghuhukom, ug sa niining abli nga balaang Basahon. Mabati ko mismo sila sa sama nga mabati ko ang akong mga kamot sa pagdapat niini sa akong nawong. Gihangop

nila ako, nga wala'y sensasyon sa mga kababayan-an didto kumpara sa kung unsa ang anaa kanato sa karon. Bisan unsa pa kamo ka balaan, bisan kinsa pa kamo, unsang klase man kamo nga magwawali, mapari o kung unsa man kamo, wala gyu'y lalaki nga pasagdang hangopon siya sa usa ka babaye, nga wala'y gibating tawhanong sensasyon. Mao gyud kana ang tinuod. Apan, igsoon, kung nakatabok ka na gikan dinhi paingon didto, dili na ingon niana didto. Oh, grabe! Kini medyo nga. . . Oh, adunay. . . Imposible na kini. Gugma na didto tanan. Ang tanan didto tinuod gyud nga igsoong lalaki ug tinuod gyud nga igsoong babaye. Wala na'y kamatayon, wala na'y kasubo, wala na'y kasina, wala na'y bisan unsa pa, wala gyu'y mga ingon niana nga makasulod didto. Kahingpitan ra gyud. Ingon niana ang gipanguha ko. Para sa ingon niana nga ginapahimutang mo sa hustong posisyon.

¹⁰¹ Ingon ko, “Oh Ginoo, mao kana ang ginaanhi ko sa iglesia, gipaningkamutan nga ihan-ay ang iglesia.” Isulti ko sa inyo, igsoong lalaki ug igsoong babaye, nga adunay usa ra ka butang ang makasulod niana, og kana'y hingpit nga gugma. Dili tungod nga maunongon ka sa Branham Tabernacle, o sa iglesiang Methodist o iglesiang Baptist. Maayo man kana, angay lang man pud nga ingon niana mo. Apan, oh mga higala, kinahanglan ninyong. . . Dili tungod nga nagsulti kamo og mga pinulongan, nagsayaw diha sa Espiritu, dili tungod nga gihinginlan ninyo ang mga yawa o nagpabalhin og mga bukid pinaagi sa pagtoo. Maayo man kanang tanan, tungod kay maayo man gyud kana, apan bisan pa niana gawas nga maanaa sa sulod ang tinuod nga hingpit nga gugma. Didto nagpuyo ang hingpit nga gugma. Ug mao lamang kana ang bugtong butang nga magpasulod kanimo didto. Ug mao lamang kana ang bugtong butang nga makapabilin didto, mao lang kana ang bugtong butang nga aduna, didto. Oh, grabe! Usa kini ka pagsagop. Ang Dios, sa wala pa ang pagkatukod sa kalibutan!

¹⁰² Karon, dalion na nato, tapuson na nato kining usa ka kapitulo, sa unsa mang paagi, kung mahimo, sa sunod nga napulo ka minuto.

*Nga diha usab nahimo kita nga usa ka panulondon. . .
(Gipanunod nato ang unsa? Ang Kinabuhing Walay
Katapusan.) . . . nga kita gipili-nang-daan. . .*

Sa unsang paagi? Nasabtan ba sa tanan kana? Kamo ba ang nagtawag sa Dios? Dili, ang Dios ang nagtawag kaninyo. Moingon ang ubang mga tawo, “Oh, gipangita gyud nako ang Dios, ug gipangita ko ang Dios.”

Wala man ka nangita. Wala gyu'y tawong nangita sa Dios. Ang Dios mao ang nangita sa tawo. Miingon si Jesus, “Walay tawong makahimo sa pag-ari Kanako gawas kon pagadanihon

siya sa Akong Amahan.” Kita n’yo, kinaiyahan na sa tawo nga modagan palayo sa Dios. Ug moingon mo karon. . .

¹⁰³ Kana, mao kana ang nagapabalaka kanako, bisan pa man, ang magwali sa inyo nga mga tawo; ayaw na kamo pagpabilin sa mao rang kahimtang sa kung unsa kamo kaniadto pa, magbag-o na kamo! Paminawa ako ninyo sa pagsulti ko niini, KINI ANG GINAINGON SA GINOO. Wala nako sukad ginatawag ang akong kaugalingon nga ingon niana, wala gyud. Apan ginatawag ninyo ako nga inyong manalagna, o usa ka propeta. Gitooan kana sa kalibutan, sa tibuok kalibutan, minilyon-milyon ug milyon nga mga tawo. Nagwali na ako nga direkta ug di-direkta sa napulo o—napulo o dose ka milyon nga mga tawo, o sobra pa, nga direkta kong giwalihan. Nakita ko ang tignapulo ka linibo nga mga panan-awon ug mga ilhanan ug mga katingalahan, ug wala gyu’y ni usa niini ang napakyas. Ug husto kana. Gisulti na Niya daan kanako ang mga butang nga eksaktong nangatuman nga wala gyu’y pagkapakyas. Ginahagit ko ang si kinsa man alang niana. Husto kana. Wala nako angkona ingon nga usa ka propeta, pero nanalinghug gihapon kamo kanako.

¹⁰⁴ MAO KINI ANG GINAINGON SA GINOO, magkinahanglan gayud og hingpit nga gugma aron makaadto kamo nianang lugara, tungod kay mao lamang kana ang aduna didto. Bisan unsa pa nga kuwarta, unsa pa ka daghang relihiyosong pagpamatuod, unsa pa ka daghang mga maayong buhat ang nabuhat ninyo o kung unsa man ang nabuhat ninyo, pagmoabot na kanang adlaw. Magkinahanglan gyud kini og hingpit nga gugma. Busa bisan unsa man ang ginabuhat ninyo, ipadaplin ninyo ang tanang uban pang mga butang hangtud nga mapuno kamo sa gugma sa Dios hangtud nga mahimo n’yong higugmaon kadtong nanagdumot kaninyo.

¹⁰⁵ Ako gayu’y, ingon sa gisulti ko na kaganinang buntag, ako’y gilalang, ang kinatibuk-an nako tungod ra gyud sa grasya. Daghang mga tawo ang nanag-ingon, “Karon, katola ang akong likod ug katolon ko usab ang imong likod. Oo, buhaton mo ang usa ka butang para kanako ug buhaton ko pud ang usa ka butang para kanim.” Dili ingon niana ang grasya. Ang grasya mao’y, kung mokatol ang imong likod, katolon ko kini sa gihapon, katolon mo man ang akong likod o dili; sagpaon mo man ako sa nawong, ug ingnan “ang akong likod kinahanglan katol-. . . , o nagkinahanglan nga katolon,” katolon ko kana. Kita n’yo? Ingon niana, katolon mo sa gihapon. Dili ko motoo sa mga buhat. Nagatoo ko nga ang mga buhat gugma. Ang mga buhat maoy—ang mga buhat maoy pagpakita lamang nga aduna na’y nahitabo nga grasya. Dili ingon nga nagakinabuhi ako nga matinud-anon sa akong asawa tungod kay gahunahuna ko nga basin unya iya akong bulagan kung dili ako ingon niana, nagkinabuhi ako nga matinud-anon sa akong asawa tungod kay gihigugma ko man siya.

¹⁰⁶ Wala nako ginawali ang Maayong Balita tungod lang kay sa hunahuna nako nga basin unya mahiadto ako sa impiyerno kung dili ako magwali, Ginawali ko ang Maayong Balita tungod kay gihigugma ko man Siya. Mao gyud. Sa hunahuna n'yo ba ginatabok ko kanang mabagyohong mga dagat, ug magpatibugsok-bugsok ang ginasakyan kong eroplano, ug magsige pa pangilat, ug—ug tanan nang uban pa, ug sa unsa man nga minuto...ug nanagsiyagit na ang tanan, ug “Maghimaya ka Maria” na ang madungog mo sa tibuok eroplano, ug tanan na? Ang mga tawo dili na mahimutang diha sa ilang mga safety belt, ug nagasulti ang piloto, “Igo na lang ang atong tubil para sa sunod nga kinse minutos, og wala ko kabalo kung asa na kita karon.” Sa hunahuna n'yo ba nga buhaton ko kana para lang—para lang ba og panglingawlingaw nga ginabuhat ko kana? Huh! Sa hunahuna n'yo ba nga basta na lang ako nga moadto didto sa lasang kon diin kinahanglan akong tabunan sa mga sundalong German sa ilang mga kamot nga *ingon-ani* sa matag gabii ug kuyugan sa akong pagsulod ug paggawas sa tigum, hangtud nga mosugod nang mamuhat ang Balaang Espiritu og mga milagro? Atua pud didto ang mga komunista nga may mga panggabiing teleskopyo, aron pusilon ako bisan usa pa ka milya ang gilay-on. Sa hunahuna n'yo ba nga ginabuhat ko kana para lang sa lingawlingaw niini? Tungod kini nga adunay butang sa sulod nako nga nahigugma; sila ang mga tawong gipakamatyan ni Cristo. Miingon si Pablo, “Dili lamang ako nakaandam nga moadto sa Jerusalem, kondili motungas ako didto aron ilansang sa krus. Moadto ako aron mamatay. Moadto ako didto aron mamatay tungod og alang sa Ginoo.” Usa mismo kini ka butang, gugma ang maoy nagtukmod kanimo, nga nagapalihok kanimo. Eksaktong mao gyud kana.

¹⁰⁷ Kung ginawali ko ang Maayong Balita tungod lang sa kuwarta, kung tungod man sa ingon niana, wala unta ko'y utang nga baynte mil ka dolyar karong gabhiona, dili unta ako ingon niana ka lubong sa utang. Dili, sir. Tungod kay gibulsa ko na unta ang uban sa—uban sa mga milyon nga gihatag sa ako. Usa ka tawo, usa ka tawo ang nagpadala og mga tinugyanan sa FBI nga may dala og usa ka milyon-ug-lima-ka-gatus-ka-libo-ka-dolyar nga tseke. Ug ingon ko, “I-uli ninyo kana.” Dili tungod sa kuwarta! Dili kini panguwarta. Wala ako nagawali sa Maayong Balita tungod sa kuwarta. Wala ako nagawali tungod niana!

¹⁰⁸ Tungod kini sa gugma. Ang butang nga gusto kong buhaton, mao'y, sa dihang tabukon ko na ang katapusang gininhawa ko paingon nianang lugara, nga mahimong lima na lang ka minuto gikan karon, mahimong duha na lang ka oras gikan karon, mahimong singkuenta ka tuig pa gikan karon, wala ko kabalo kung kanus-a gyud. Apan kung mahitabo man kini, nga makaabot na ako didto, gusto ko nga makita kamo nga anaa sa kalagsik sa kabatan-on, nga nagadagan, nagasinggit, “Akong

pinanggalang igsoon! Akong igsoon!” Mao kana ang sulod sa kong kasingkasing. Mao kana ang hinungdan. Wala ko gapaninguha nga dimouyon sa inyo aron nga—aron lang nga mamahimong lahi, kondili gapaninguha kong ibutang kamo sa hustong dalan. Mao kana ang dalan pasulod. Dili sa inyong iglesia, dili sa inyong denominasyon, kondili ang inyong pagkahimugso diha kang Cristo. Oh, pagkamaanindot! Whew!

Nga diha . . . nahimo kita nga . . . usa ka panulondon, nga kita gipili-nang-daan sumala sa iyang katuyoan sa nagabuhay sa tanan nga mga butang sumala sa pagbulot-an sa iyang kaugalingong kabubut-on:

¹⁰⁹ Paminaw. Magatapos na kita sulod sa pipila na lang ka minuto. Paminaw kamo og ayo karon sa dili pa kita magtapos.

Aron kita mahimo nga alang sa pagdalayeg sa iyang himaya, nga kaniadto milaum . . . kang Cristo.

Nga kaniya usab kamo nagsalig, . . .

¹¹⁰ Matikdi n’yo kini karon, og ayo. Sul-oba ang inyong mga jacket, mga jacket sa Maayong Balita. Ablihi ang inyong mga igdulongog, paminaw og ayo. Anaa na ako sa ika-13 nga bersekulo.

Nga kaniya usab kamo nagsalig, sa pagkadungog ninyo . . .

“Ang pagtoo nagaabot pinaagi sa . . .” [Nagaingon ang kongregasyon, “Pagpatalinghug.”—Ed.] “pagpatalinghug sa . . .” [“Pulong.”] “Pulong sa . . .” [“Dios.”]

. . . sa pagkadungog ninyo sa pulong sa kamatuoran, . . .

¹¹¹ Unsa man ang Kamatuoran? Ang Pulong sa Dios. Husto ba kana? Juan 17:17, kamo nga ginasulat ang mga Kasulatan, giingon ni Jesus, “Balaana sila, Amahan, pinaagi sa Kamatuoran. Ang Imong Pulong mao’y Kamatuoran.”

. . . pagkahuman . . . ninyo pagkadungog sa . . . kamatuoran, ang maayong balita mahitungod sa inyong kaluwasan: . . .

¹¹² Unsa ba ang kaluwasan nga gapaningkamotan niyang isulti ngadto kanila? Ingon nga mga gipili-nang-daan sa wala pa ang pagkatukod sa kalibutan (Husto ba kana?), ngadto sa pagkasinagop ingon nga mga anak, mga gipili-nang-daan ngadto sa Kinabuhing Walay Katapusan. Karon, pagkahuman ninyong maabot ang Kinabuhing Walay Katapusan, pagkahuman ninyong maluwas, mabalaan, mapuno sa Balaang Espiritu, mga anak na kamo. Karon gusto sa Dios nga mapahiluna na kamo sa inyohang posisyon, oh, aron nga makapamuhay na kamo alang sa Iyang Gingharian ug sa Iyang kahimayaan.

¹¹³ Mao kana ang Maayong Balita. Nga, una, manalinghug sa Pulong, “Maghinulsol, ug magpabautismo sa Ngalan ni Jesus Cristo alang sa kapasayloan sa mga sala.” Ginatangtang ang tanan nimong mga sala, pagtawag sa Ngalan sa Ginoong Jesus Cristo, para sa Yutang saad. Ang saad maoy alang sa matag lumalangyaw nga anaa na sa mao mismong panaw. Kung mibiya ka sa imong balay karong gabhiona, nga usa ka makasasala, nga nag-ingon, “Moadto ako didto sa Branham Tabernacle,” Ginahatagan ka og kahigayonan sa Dios karong gabhiona. Adunay usa ka butang nga gipahimutang tali sa imo ug sa Yutang Saad. Unsa man ang Yutang saad? Ang Espiritu Santo. Ang nakapataliwala kang Josue kaniadto ug sa yutang saad mao ang Jordan. Mao gayud.

¹¹⁴ Si Moises, ingon nga usa ka tipo ni Cristo, gipangunahan ang mga anak padulong ngadto sa yutang saad, wala nadala ni Moises kaniadto ang mga anak pasulod sa yutang saad. Si Josue ang nagdala pasulod sa maong mga tawo ug gipangbahinbahin ang maong yuta. Si Jesus ang nagbayad sa bili, nga gipangunahan sila padulong ngadto sa Balaang Espiritu. Gipadala sa Dios ang Balaang Espiritu ug gipahiluna Niini sa posisyon ang iglesia sa hustong pagkahan-ay, nga ginapuno, ang matag tawo sa Presensiya sa Iyang Persona. Nakita n’yo ba ang buut kong ipasabot? Ang tanan anaa diha kang Cristo Jesus, kung giunsa nga gipili-nang-daan kini sa Dios ngadto sa pagkatinawag para sa Maayong Balita!

¹¹⁵ Si Pablo, diha sa Mga Taga-Galacia 1:8, miingon, “Kung adunay usa ka Manulonda ang moabot nga magwali og bisan unsa nga lahi, ipatunglo siya.” Ang Kamatuoran, ang Ebanghelyo. Karon paminaw og ayo samtang magpadayon pa kita sa pagbasa, sa pagtapos sa bersekulo.

...ang maayong balita sa inyong kaluwasan: nga kaniya usab... (Paminaw og ayo)... human nga mingtoo kamo, giselyohan kamo sa Balaang Espiritu sa saad,

¹¹⁶ Sa kaulahiang mga adlaw, ang giingon sa Biblia, karon tan-awa, magkaaduna og duha ka matang sa mga tawo sa kaulahiang mga adlaw. Ang usa sa duha niini adunay Selyo sa Dios, ang usa na usab aduna og marka sa mapintas nga mananap. Husto ba kana? Pila na ang nakahibalo niana? Bueno, kung ang Selyo sa Dios mao ang Selyo sa . . . Kung ang Selyo sa Dios mao ang Espiritu Santo, nan ang kawala’y Espiritu Santo mao ang marka sa mapintas nga mananap. Ug giingon sa Biblia nga mamahimong magkaparehong-magkapareho ang duruha ka espiritu nga pagalimbongan niini ang mismong mga Pinili kung mahimo pa. Dili gyud kana mahitabo, tungod kay mga pinili man sila ngadto sa Kinabuhing Walay Katapusan. Kita n’yo?

¹¹⁷ Mga magsisimba, sama sa nahibaloan nato nga adunay

napulo ka dalagang ulay nga migawas aron tagboon ang Ginoo, silang tanan mga gibalaan na, mga balaan, ang matag usa kanila mga gibalaan mismo. Ang lima kanila naglangay-langay ug gipasagdan nga mapalong ang ilang mga lamparahan. Ang lima adunay lana diha sa ilang mga lamparahan. “Ug, ania karon ang Pamanhonon nagaanhi!” Ug ang lima nga adunay lana diha sa ilang lamparahan misulod ngadto sa Pangkasal nga Panihapon. Ug ang tanang uban pa nahabilin sa gawas kon diin didto ang mga paghilak ug pagdanguyngoy ug pagkagut sa mga ngipon. Mao nga pagpangandam gyud mo, kay wala mo kabalo kung unsang minuto moabot ang Ginoo. Magkaadunay... Unsa ba ang ginarepresentar sa lana diha sa Biblia? Balaang Espiritu.

118 Karon sa inyo karon, kamong mga igsoong Seventh-day Adventist nga nagsulti nga ang ikapitong adlaw mao ang Selyo sa Dios, pakitai ko ninyo og usa ka Kasulatan nga mapamatud-an kini. Giingon sa Biblia nga ang Selyo sa Dios mao ang Espiritu Santo. Tan-awa kini. “Nga...” Tan-awa sa ika-13 nga bersekulo ha.

*...human nga kamo mingtoo, kamo giselyohan sa—
sa balaang Espiritu sa saad.*

119 Ablihi n’yo sa Mga Taga-Efeso 4:30, siguro anaa kana dinha. Tan-awa kung wala ba nato makuha ang 4:30, tan-awa kung dili ba kini magkapareho. Mga Taga-Efeso, sa ika-4 nga kapitulo ug sa ika-30 nga bersekulo. Oo, ania diri sa, 4:30.

*Ug ayaw ninyo pagsub-a ang balaang Espiritu sa Dios,
nga diha kaniya giselyohan kamo hangtud sa adlaw sa
pagtubos.*

120 Hangtud unsa kadugay? Kung tinuod nga imong, kung tinuod nga imo nang nadawat ang Espiritu Santo, hangtud kanus-a ba Kini magdugay sa imo? Hangtud ba sa sunod nga rebaybal, hangtud ba nga magkatagboay mo sa dalan sa imong lola, hangtud ba nga masingkahan ka sa imong amo? Hangtud sa adlaw sa inyong katubsanan! Alleluyah!

121 Pagnamatay na kamo, human nga nakalabang na kamo pasulod nianang Yutaa, nga nagtindog na kamo didto kauban sa inyong mga minahal, puno sa gihapon kamo sa Espiritu Santo. Kana ang Kasulatan! Mao ra gihapon kamo kung unsa kamo karon, aduna lamang kamo’y usa ka... nibalhin lang kamo sa bag-ong lawas. Nagbalhin lamang kamo og pinuy-anan. Nadaan na kining lawasa, dili na ninyo mailansang pa ngadto niini ang atop, dunot na ang mga talauran og atop. Husto kana. Busa biyaan n’yo na ang maong daang balay ug pasagdan nga madunot na kini, ug magbalhin na ngadto sa usa ka bag-o. Husto ba kana? “Kay kung kining yutan-ong payag matun-as na, adunay usa nga nagapaabot kanato.”

122 Nadumduman n’yo pa ba niadtong miaging adlaw, nga nahisgotan nato kana? Sa dihang naporma ang usa ka gamay’ng

bata sa tagoangkan sa inahan, ug nagasipa-sipa na ang gamay'ng mga tiil niini ug nagaugpot ug nagsige-sige nang lihok. Pero pagkahuman mismo panganak sa inahan sa maong masuso ug milugwa na kini sa kalibutan, ang unang butang, adunay usa ka espirituhanong lawas nga modawat nianang gamay'ng natural nga lawas. Tingali hatagan kini sa doktor og usa ka... [Ginapikpik ni Igsoong Branham ang iyang mga kamot—Ed.] sama *niini*, o usa ka butang para yugyogon kini, ug “Whaah, whaah, whaah!” Ug dihadiha dayon ipasuso kini ngadto sa suso sa inahan, “um, um, um,” i-ungad mismo niini ang iyang gamay'ng ulo pataas ug paubos sa mismong suso sa inahan, aron pagawason sa niadtong mga ugat sa suso ang gatas.

¹²³ Ang usa ka nati, pagkapanganak nga pagkapanganak kaniya sa inahan, itindog niini ang iyahang mga gagmay'ng tuhod pagkahuman sa pipila ra ka minuto. Unsa dayon ang buhaton niini? Molakaw kini mismo diretso pabalik, modutdot kini sa iyahang inahan, ug magsugod nga i-ungad ang iyahang gamay'ng ulo pataas-ug-paubos nga ingon niana, sa pagsuso og iyahang gatas. Alleluyah! Oo, sir.

¹²⁴ Pagmogawas na kining natural nga lawas, adunay espiritual nga lawas nga nagpaabot para niini.

¹²⁵ Ug sa diha nga kining natural nga lawas mamatay og matumba na sa yuta, alleluyah, adunay usa pa nga nagpaabot didto! Nagabalhin lang kita gikan sa usa padulong ngadto sa usa pa, nagbag-o lang kita og lugar-puy-anan. Kining lawas nga maykamatayon kinahanglan magsul-ob og waykamatayon, niining espiritual; kining may-pagkadunot magsul-ob sa waypagkadunot. Kining tigulang nga nangunot na, uk-uk na, bakò na nga lawas, pero dili gihapon mabag-o ang hitsura niini, buut kong ipasabot pag atua na kini didto, anaa sa imo gihapon ang mao rang espiritu.

¹²⁶ Tugoti nga hatagan ko kamo og usa ka butang nga medyo talinghaga kaninyo, pero anaa kini sa Biblia, ayha nako kamo hatagan og usa pa aron mapasabot kini sa inyo. Tan-awa kini. Sa dihang ang tigulang nga si Saul, ang—ang hari kaniadto, ang—ang dugay nang, inila og batid nga magwawaling denominasyon didto niadtong panahona, kabalo na mo, nga pinakamataas kanila tanan, ug siya nahadlok, wala sila'y hibangkaagan bahin sa Supernatural. Kinahanglan ni David nga moadto ug luwason ang karnero gikan sa baba sa leon, gipatay bisan si Goliath. Tan-awa gani siya. Nagpalayo na siya og ayo gikan sa Dios, gidumtan na niya kining magwawali nga holy-roller. Ug imbes nga modapig niini, aron unta tabangan kini, nahimong supak pa hinoon siya niini. Kung dili ba kana ang litrato mismo, ang eksaktong litrato! Mitalikod siya mismo niini!

¹²⁷ Pila ba ang ania dinhi niadtong paggikan nako sa unang pagbiyahe ko, ug giwali ko ang, “Ang pagpatay ni David kang

Goliath,” niadtong paglarga nako? Daghan, ubay-ubay, pipila sa mga daan na. Nangandam na pud ako nga molarga nga pagahisgotan kini. Nahinumduman n’yo pa ba, kung unsa ang nahitabo niadtong miaging Dominggo? Nagapaingon na kini ngadto sa usa ka bag-ong hugna. Ang ikaduhang bulohaton ni David, ang ikaduhang hugna sa iyang ministerio. Eksakto gyud kana. Nga, pagkahuman niadto nahimo na siyang hari sa Israel. Namatikdan n’yo nga ang ministerio karon nagapadulong na ngadto sa usa ka mas hataas pa nga hugna, nahimong mas halangdon pa. Ingon niana usab kaniadto kang David. Namatikdan ko kini sa dihang miadto siya, si David, oh, niadtong gipaadto sa Dios si David didto ug gipatay ang leon, nakita n’yo, ug gipatay niya usab ang oso, dayon gipatay ang Filistihanon. Karon, miabot ang panahon nga nagtugyan ang Dios og usa ka dautang espiritu ngadto sa maong tigulang nga lalaki. Ug sa... Aron unsa man? Aron dumtan si David. Ug nagtoo ko...

¹²⁸ Karon, kining mga teyp. Karon paminaw gyud kamo, mga igsoon, kamong mga nagapaminaw sa teyp, kung dili man kamo mouyon kanako, pasayloa ninyo ako. Kita n’yo, gimahal ko kamo. Magkitaa’y man kita didtong lugara bisan pa man, kita n’yo, tungod kay kung tawo kamo sa Dios matagbo ko man kamo gihapon. Pero, gusto kong isulti kini, ania ang hinungdan: Tungod lang sa nakita ni Saul nga si David adunay usa ka butang nga wala kaniya. Dayon unsa ang nahitabo?

¹²⁹ Usa ka medyo gamayong “mapulapula,” bakòon, giingon sa Biblia nga siya mao’y “mapulapula.” Dili siya kaayo kaguwapohan nga bata, “mapulapula ang aping” nga medyo gamayong bakòon nga klase sa lalaki. Ug miadto siya didto, ug si Saul, aba, iyang gipasul-ob ang iyang hinagiban kang David, ug mahunahuna ko kadtong taming nga misagiyad sa iyang tilan. Ug ingon niya, “Tangtanga ninyo kining butanga kanako. Ako—akong...” Siguro gihatagan niya si David og digre sa pagka-doktor, usa ka Ph.D. o L.L.D., o kung unsa, kabalo na mo. Kung unsa nga gisulti niya, “Wala gyud ko’y alamag bahin nianang butanga, tungod kay wala ko pa kana napamatud-an. Pasagdi ako nga gamiton kini, kung unsa lang ang nahibaloan kong gamiton.” Oo, sir. Gikuha niya ang lamboyog.

¹³⁰ Ug napasuko nila si David tungod nga ang mga anak nga babaye, ang mga iglesia, giawit sa mga iglesia ang, “Si Saul, linibo ang iyang mga gipatay, apan si David tignapulo ka linibo ang iyang mga gipatay.”

¹³¹ Dayon nasina si Saul, “Kanang karaang butang sama nianang Ngalan ni Jesus, wala’y nada Kana.” Husto kana. Ug unsa man ang gibuhay sa Dios kang Saul? Nagpadala ang Dios og usa ka dautang espiritu ngadto kaniya, aron dumtan si David, ug nagdumot siya kang David sa walay hinungdan.

¹³² Nahimo na unta ni David nga lubagon ang liog niya sa pipila na ka higayon. Nahimo na unta niya, pero gipasagdan na lang niya kini. Wala gyud siya'y gisulti og unsa man. Siguradong-sigurado nga mahimo gyud niya kadto. Giadtoan niya kaniadto si Saul ug giputlan ang sidsid sa kupo niini, usa niana ka gabii, dayon gibalikan, miingon, "Lantaw dinhi, nakita mo!" Oo, sir, siguradong nabuhat na unta niya, pero gipasagdan na lang niya siya. Nahimo na unta niya nga bungkagon ang iyang kongregasyon ug magkatibulaag sila, ug magsugod og kaugalingon niyang organisasyon kung gustohon niya. Pero wala gyud niya kana gibuhat, gipasagdan lang niya si Saul nga magpadayon. Gipahanugotan niya nga ang Dios na ang makig-away. Oo, sir.

¹³³ Mao nga samtang nagpadayon siya ug pahuman na ang bulohaton, ug nagpadayon kadto, nagkagrabe ang dautang espiritu hangtud nga wala na'y makuhang tubag si Saul gikan sa Dios. Sa wala madugay siya . . . ang Espiritu sa Ginoo mingbiya na kaniya. Ug ang tigulang nga si Samuel, ang tawo nga gisalikway nila, ang tawo nga mao'y tinuod nga Tingog sa Dios ngadto kanila, ang tawo nga nagawali kanila sa wala pa nila gigustong manglihok nga sama sa kalibutan . . .

¹³⁴ Unsa man nga gusto sa iglesia manglihok nga sama sa kalibutan? Nganong gusto man sa Pentecostal, nga bautismado na, Methodist nga nakasinati na sa Espiritu Santo, ug Baptist, ug Presbyterian ang gustong manglihok nga sama sa kalibutan? Nganong ginabuhat nila kana? Wala ko kabalo. Ako—dili ko kana masabtan. Moingon mo, "Bueno, makalingaw man gud ang pagdula og baraha, gamay ra man kini nga paglingaw-lingaw, gamay ra man kini nga pustahan," kung unsa man ang tawag ninyo niini. Sala kini. Kinahanglan nga wala kamo niining mga butanga sulod sa inyong balay. "Oy, dili man makadaut nga moinum og gamay'ng lad-ok sa beer. Pipila ra man ka lad-ok ang among giinum. Pipila ra man ka lad-ok sa hapon ang nainum nako ug sa akong asawa." Ug mahibaloan mo na lang, nilad-ok na pud diay ang imong mga anak. Sigurado gyud kana.

¹³⁵ Ug kamong mga kababayen, hum, naghimo lang ang yawa og usa ka . . . Mao kana ang gibuhat niya kaniadto sa sinugdanan, ug puntirya gyud niya kamong mga igsoong babaye. Ginabuhat niya kana aron lang . . . tungod nga kabalo man siya kung unsa ang iyang mahimo. Mahimo niyang limbongan ang babaye sa makalibo ka higayon ka paspas kaysa usa ka lalaki. Kabalo ko nga masakitan ang inyong pagbati, pero mao kana ang Kamatuoran. Eksakto kana. Mao kana ang iyang gibuhat kaniadto sa tanaman sa Eden. Mahimo niyang . . . Karon, matinuoron si Eva, sinsero siya, pero nalimbongan siya. "Si Adan wala gyud nalimbong," ang giingon sa Biblia. Wala gyud siya nalimbongan, kondili ang babaye ang nalimbongan. Busa masayon ra limbongan ang babaye. Ug bisan pa niana magsige

ra gihapon ang mga pastor ordena og mga babayeng magwawali, hatagan sila og posisyon aron magdumala sa mga kongregasyon nga sama niana, ug ginakondena kana niining Biblia sugod pa sa Genesis hangtud sa Pinadayag. Moingon mo, “Bueno, okey ra na. Okey ra na. Nagkaaduna sila . . . Puede man silang magwali nga sama niana.” Kabalo nga tinuod kana.

¹³⁶ Sama niadtong adunay nagsugod pagsulti’g ubang mga pinulongan usa niana ka higayon, nagpadayon lang ako sa pagwali, ug sa paggawas nako . . .

Usa ka babaye ang nagsulti sa akong anak, miingon, “May mensahe ako nga igahatag ugma sa gabii,” ingon pa, “pagmoadto na ang imong papa sa entablado.”

Giingnan siya, “Bueno, Mrs., unsa man ang buut mong ipasabot?”

¹³⁷ Ug niadtong gabhiona sa dihang andam nang, sa dihang nag-andam na akong mohimo’g pagtawag sa altar, gihapsay sa babaye ang iyang buhok ug gibira ang iyang stocking ug tanan na, nangandam pud, miadto dayon didto sa tunga ug misugod og lukso-lukso, nagsulti’g ubang mga pinulongan ug nanagna. Nagpadayon lang ako sa pagwali, mihimo og pagtawag sa altar. Ni wala ko man lang gitahud kadto bisan gamay, dili man gud kadto husto. Busa dayon, bueno, giingon sa Biblia nga dili angay, miingon, “Ang—ang Espiritu sa mga manalagna sakup sa manalagna.” Ang Dios anaa sa . . . kung nagapamulong ang Dios sa entablado, tugotan Siyang mamulong. Miingon si Pablo, “Kung adunay butang nga ipadayag sa usa, ka tawo maghilum una siya hangtud nga mahuman ang usa pa.” Mao kana ang husto.

¹³⁸ Karon, dayon sa nakagawas na ako, nanag-ingon kining mga tawo, usa ka dakung grupo sa mga tawo, ang nanag-ingon, “Gipasubo mo ang Espiritu Santo karong gabhiona.”

Ingon ko, “Sa unsa man? Unsa man diay ang akong gibuhat?”

¹³⁹ Miingon, “Abi nimo, niadtong ipahayag na sa igsoong babaye ang kadtong mensahe, alleluyah,” ingon pa, “sa isulti na unta.”

“Oy,” ingon ko, “nagwali pa ako niadto. Wala ang babaye sa kahan-ayan.”

¹⁴⁰ “Oh,” miingon pa, “lab-as kadto nga gikan pa sa Trono. Mas lab-as pa kadto sa kung unsa ang ginawali mo.” Uh!

¹⁴¹ Karon, ginapakita lang niadto ang . . . ginapakita lang niadto ang hain man niini, ug ginasulti ko kini nga maypagtahud sa inyo, o kun may pagkabuang, o kun waypagtahud, o binurong nga pagpanudlo nga walay alamag bahin sa Dios kaysa usa ka koneho nga kabalo bahin sa sapatos-pang-niyebe. Karon, niana, wala ko ginasulti kana para mamahimong usa—usa ka hinangal nga sulti, tungod kay dili kini lugar sa pagpatawa. Apan kana—mao kana ang eksaktong kamatuoran. Ang tawo

nga nakabalo nga ang Dios dili usa ka tig-pasiugda og kalibog. Siya ang kalinaw. Wala sila hibangkaagan sa maong Biblia. Ang nahibaloan lang nilang buhaton mao'y magluksolukso, magsulti'g ubang mga pinulongan, moingon, "Anaa na kanako ang Espiritu Santo. Alleluyah!"

¹⁴² Nakaadto na ako ug nakakita na, didto sa Africa, og mga barangan ug ingon nianang mga butang nga magsulti'g, dungan ang lima ka libo kanila; magluksolukso, nga may dugo sa tibuok nilang mga nawong, magsulti'g ubang mga pinulongan, ug manginum og dugo gamit ang bagolbagol sa tawo; manawag og yawa, ug magsulti'g ubang mga pinulongan.

¹⁴³ Ug bisan pa man usa ka gasa sa Dios ang magsulti'g ubang mga pinulongan, apan dili kana mao ang dili-masayup nga kapanghimatuoran sa Espiritu Santo. Tugoting isulti ko sa inyo karon. Nagatoo ako nga ang tanang dinihogan nga mga balaan nagasulti sa ubang mga pinulongan. Nagatoo ako nga ang usa ka tawo usahay madihogan og ayo sa Dios hangtud nga magsulti ka og ubang mga pinulongan. Nagatoo ako niana. Apan wala ako nagatoo nga kana'y usa gayud ka timailhan nga anaa na kanimo ang Espiritu Santo. Oo, sir. Nagatoo ako nga adunay mga panahon kon diin aduna ka'y pagtoo, nga ang maong tawo, duolan mo mismo og pandongan og mga kamot ang usa ka gamay'ng bata nga may kanser, kon diin singkuwenta na ka magwawali ang nag-ampo na niini, ug mamaayo kini tungod nga may pagtoo ang inahan niini alang nianang bata. Gihatag kini sa Dios ngadto sa inahan, ingon nga usa siya ka miyembro sa Lawas ni Cristo. Oo, sir. Nagatoo ako niana. Nakita ko na nga napahigayon kana ug kabalo ko nga tinuod kana. Pero ang importante niini, mao'y ipahiluna sa kahan-ayan ang iglesia, ipahimutang kini sa kahan-ayan aron maipahigayon nato kini.

¹⁴⁴ Karon tapuson na nato ang nahabilin sa niining bersekulo dinhi sa dili pa kita manggawas.

...*human nga inyong nadawat, kamo giselyohan sa balaang espiritu sa saad.*

¹⁴⁵ "Selyo!" Unsa ba ang Selyo? Unsa ba ang Selyo? Ang selyo mao'y, ang unang butang nga ginapakita niini mao'y usa ka buhat nga human na, usa ka buhat nga kumpleto na. Ang sunod butang nga ginapakita niini mao'y pagpanag-iya. Ug ang sunod butang nga ginapakita niini mao'y siguridad, nga gipanalipdan kini.

¹⁴⁶ Ingon nato, pananglitan, nagtrabaho ako kaniadto sa Pennsylvania Railroad, kauban nako kaniadto sa pagtrabaho ang akong amahan didto sa riles sa tren. Ginakargahan namo kaniadto ang mga bagon. Ug mangarga kami dinhi kaniadto para sa kumpanya sa lata, mangarga kami og mga lata, ug mangarga kami og pipila *dinhi* sa itaas ug pipila *dinhi* sa ubos, ug ang uban sa *niini* nga bahin usab. Apan sa dili pa

maselyohan ang maong bagon, mosulod una didto ang inspektor, ug itulod niya kini, ihandos *kining* usa, uyogon *kanang* usa. “Ah! Ayaw kini padayona! Mangadaut kini tanan sa dili pa kini sila makaabot sila didto. Ayaw kini ipapadayon! Panangtanga kini tanan. Utroha ninyo kini.” Dili ipabiyahe sa inspektor ang maong bagon.

¹⁴⁷ Ang Espiritu Santo mao ang Inspektor. Uyogon Niya kamo og diyutay, ug mokagulkul kamo. “Ginatooan mo ba ang tibuok Pulong sa Dios?”

“Wala ako nagatoo nianang karaang butang sama nianang Ngalan ni Jesus.”

“Dili kini ipabiyahe. Mangagulkul kamo.”

“Wala ako nagatoo sa Balaanong pagpang-ayo o wala gyu’y ingon nianang butang.”

“Gakagulkul gihapon. Tangtangan ang mga niini.”

“Nagatoo ka ba nga si Jesus Cristo, mao sa gihapon kagahapon...?”

“Bueno, sa ubang paagi lang.”

“Gakagulkul ka. Ipalagpot kana, kita n’yo, dili pa kini andam.” Oo, sir.

¹⁴⁸ Igsoon, kung andam na niining isulti, “Amen!”

“Nadawat mo na ba ang Espiritu Santo?”

“Amen!”

“Nakumpleto na ba ang tanan?”

“Amen.” Nan unsa na man ang buhaton sa Inspektor? Naikarga na og ayo ang tanantanan, puno na sa Maayong Balita. Oh, ang matag Pulong sa Dios maayo. Ang tanantanan okey na gyud. “Nagatoo ako sa matag Pulong. Amen! Amen! Amen!”

“Nagatoo ka ba nga ang Dios sa gihapon nagapang-ayo?”

“Amen.”

“Nagatoo ka ba nga si Jesus, mao sa gihapon kagahapon ug hangtud sa kahangturan?”

“Amen.”

“Nagatoo ka ba nga ang Espiritu Santo ingon ka tinuod sa gihapon kung unsa Kini kaniadto?”

“Amen.”

“Nagatoo ka ba nga ang mao rang Espiritu nga mikunsad kang Pablo, nagakunsad pud kanato?”

“Amen.”

“Nagatoo ka ba nga ginabuhat Niini sa ato ang mao ra gihapong butang, nga gibuhat Niini kaniadto sa ila?”

“Amen.” Oh, oh, hapit na kining nagakapuno karon. Umhum, hapit na kining mapuno, andam na nga isarado ang pultahan. Sige.

¹⁴⁹ Dayon isarado na sa inspektor ang pultahan. Unsa man ang buhaton niya? Selyohan na niya kini. Dayon moanhi siya ug kuhaon kining gamay'ng mora'g playis, moadto didto nga gamit kining gamay'ng butang ug selyohan na niya kini. Dili mo na gyud kini angay tangtangan. Kung kini, kanang bagon, kung Boston ang iyahang padulngan, dili na kana mahimong tangtangan. Bilanggoan ang silot sa pagtangtang nianang selyo hangtud nga makaabot na kini sa Boston. Ug ang tawo ra nga adunay otoridad ang maoy makatangtang nianang selyo, ug siya lang gyud. Husto kana. Panag-iya kini sa *ingon niini-ingon niana* nga kompanya sa tren. Selyo nila kana. Ilang kasigurohan kana nga kining bagon kargado na, nga andam na kining bagon. Panag-iya nila kini. Dili nila puedeng butangan og “B&O” ang “Pennsylvania.” Pero kinahanglan gyud nga maselyohan, ug sa dihang selyado na kini.

¹⁵⁰ Ug sa dihang ang Cristohanon nakargahan na sa Ebanghelyo, puno na sa kaayo sa Dios, ang tanan nga mga maayong butang sa Dios anaa na sa sulod kaniya, nga abli ang kasingkasing, andam nang mamuhat, andam na mapahimutang sa iyahang posisyon, mobuhat sa unsa mang butang nga isulti kaniya sa Balaang Espiritu nga buhaton, milabang na gikan sa kamatayon ngadto sa Kinabuhi, gibalaan na gikan sa mga butang nga iya sa kalibutan, nga nagalakaw na diha sa Kahayag samtang nagaabot sa iya ang Kahayag, nagapadayon, nan andam na siya. Dayon isarado na sa Dios ang pultahan sa kalibutan sa likod niya, ug isarado kini sa makusog nga ingon niana, ug selyohan na siya sa Espiritu Santo sa saad. Alleluyah! Hangtud sa unsa man kadugay? Hangtud na sa padulnganan. Ayaw gyud ninyo pahunonga diha sa riles sa tren ug puwersahang ablihan kini ug tan-awon kung maayo pa ba gihapon ang tanan. Siguradong maayo gihapon ang tanan, pasagdan n'yo lang kini. Human na kining gisusi sa Inspektor. Hangtud kanus-a ka bang selyado? Hangtud sa adlaw sa imong katubsanan. Mao kana kadugay ang imong pagkaselyado.

¹⁵¹ “Bueno, sa dihang mamatay ka, kung ingon-ana, Igsoong Branham, unsa man kaha pagkahuman mong mamatay, giingon mo nga anaa ra gihapon Kini kanimo?” Anaa na Kini kanimo sa hangtud-hangtud. Asa man magsugod ang Kinabuhi? Sa halaran. Dinha mismo makakita ka og gamay'ng anino. Kana ang landong, ang Selyo sa Balaang Espiritu. Dayon usa kini ka landong sa mga landong sa mga landong, sama sa gisulti ko na sa miaging adlaw. Apan sa dihang mamatay ka, magpadayon ka nga moagi nianang mga landong hangtud maabot mo ang umog, gikan sa umog padulong sa usa ka nagatulo nga tubod, gikan sa tubod padulong sa sapa, gikan sa sapa padulong sa suba, gikan

na usab sa suba padulong na sa kadagatan, kita n'yo, sa maong gugma sa Dios. Pero ikaw mao ra gihapon nga persona.

¹⁵² Tan-awa n'yo dinhi. Ang Kanhing si Saul, ang kanhing backslider, dili na siya makakonektar sa Dios, bisan pa nga wala siya malaglag. Siguradong wala siya nalaglag. Usa siya ka manalagna, apan migawas lang siya sa Dios. Kana ang hinungdan, mga igsoon, nga gisulti ko, “Wala ka nalaglag.” Busa timan-i n'yo, migawas siya sa kabubut-on sa Dios, mao nga mahibaloan mo na lang, siya—wala siya miuyon. Karon, siguro dili unta nako isulti kana. Sige, padayonon ko na lang tungod sa malipayong kongregasyon karong gabhiona. Mao nga, kabalo mo, ug mahibaloan mo na lang, oh, grabe, dayon ang. . . Kumonsulta siya sa—sa Urim Thummim.

¹⁵³ Kabalo ba mo kung unsa ang Urim ug Thummim, kini ang tabon-sa-dughan, ang ephod nga—nga gisul-ob kaniadto ni Aaron. Ug kaniadto pa, ang Dios kaniadto pa usa na ka supernatural nga Dios nga nagatubag diha sa mga pamaaging supernatural. Ug sa dihang magpropesiya ang usa ka manalagna, ug dili gani mosiga sa Urim Tummim ang mga mysteryosong kahayag, nan nasayup siya. Sa dihang isaysay sa magdadamgo ang iyang damgo ug dili gani kini mosidlak diha sa Urim Thummim, dili ko igsapayan kung unsa pa kini ka maanindot paminawon, sayup gyud kini. Husto kana.

¹⁵⁴ Ug dili ko igsapayan kung unsa man kadaghan ang naankon mong digre sa pagka-doktor ug unsa man kadaku ang imong organisasyon, sa dihang magpropesiya ka o magwali, kung dili gani kini sumala niining Pulong, sayup gyud ka, igsoon. Ikaw nga. . . Kini ang Urim Tummim sa Dios. Pag isulti mo nga wala ka gipili-nang-daan sa wala pa ang pagkatukod sa kalibutan, dili gyud kini mosidlak, tungod nga gisulti na sa Biblia nga gipili-ka-nang-daan. Pag isulti mo nga kinahanglan mong mabautismohan sa ngalan sa “Amahan, Anak, Espiritu Santo,” dili gyud kini mosidlak, tungod kay walay tawo diha sa Biblia ang nabautismohan nga ingon niana. Sa Ngalan lamang ni Ginoong Jesus. Dili kini mosidlak, mao nga aduna gyu'y butang nga sayup sa kung asa man.

¹⁵⁵ Mao nga wala tubaga sa Urim Tummim ang kanhing si Saul, ug nga wala pud siya magdamgo. Napahilayo na kaayo siya hangtud nga bisan sa damgo wala na sa iya. Busa kabalo ba mo kung unsa ang gibuhat niya? Miadto siya didto sa balbal, ug kining tigulang nga balbal, ang tigulang nga yawa nga doktor nga atua didto, balbal nga doktor. Ug miingon siya, “Mahimo ba nimo nga magtag-an?”

¹⁵⁶ Ingon sa balbal, “Oo, pero nagsulti man gud si Saul nga pamatyon kono niya ang tanan nga magtag-an.”

¹⁵⁷ Miingon siya, “Panalipdan ta ka,” nagsul-ob si Saul niadto ingon nga usa ka yano ra nga sundalo. Miingon siya, “Magtagna

ka para kanako ug dalhon mo kanako gikan sa kalibutan sa mga patay ang mitaliwan na dinhi.” Karon paminawa ninyo kini. “Dalhon mo kanako ang espiritu ni Samuel nga manalagna.”

¹⁵⁸ Ug nagsugod na ang balbal nga—nga magtagna. Ug, sa dihang gibuhat na niya, mihapa siya, miingon ang balbal, “Nakakita ako og mga dios nga nagapasaka.” Kita n’yo, usa siya ka pagano, “mga dios,” duha o tulo sila, sama sa Amahan, Anak, Espiritu Santo, o ingon niana, kabalo na mo. Miingon ang balbal—miingon siya, “Nakakita ako og mga dios nga nagapasaka.”

¹⁵⁹ Miingon, “Ihulagway daw siya. Unsa ang iyang pustora? Unsa man ang iyang hitsura?”

¹⁶⁰ Miingon ang balbal, “Niwang siya ug adunay balabal diha sa iyang abaga.” Wala gyud si Samuel nausab bisan gamay.

¹⁶¹ Miingon si Saul, “Si Samuel kana. Dalhon mo siya sa niining lawak, dalhon mo siya dinhi sa akong atubangan.”

¹⁶² Ug bantayi sa dihang miduol si Samuel sa atubangan ni Saul, miingon siya, “Nganong gitawag mo man ako, nga nakita ko man ikaw nga nahimo nang kaaway sa Dios?” Ug tan-awa. Dili lang nga siya mao ra gihapon nga Samuel, nagpabilin gihapon kaniya ang espiritu sa pagpropesiya. Ingna daw nga sayup kana, ipasulti n’yo kang bisan kinsa nga sayup kana. Ang Kamatuoran mismo kana! Usa pa gihapon siya ka manalagna. Kay giingon niya, nagpropesiya siya ug miingon pa, “Mapildi ka sa gubat ugma, ug ikaw ug ang imong mga anak mangapukan sa gubat ugma, ug sa mao gihapong oras ugma sa gabii ikaw mahiuban na kanako.” Husto ba kana? Usa gihapon siya ka propeta!

Karon moingon kamo, “Oh, pero balbal man ang nagpahigayon niadto.”

¹⁶³ Sige, isulti ko sa inyo ang Usa nga dili usa ka balbal. Usa niana ka higayon giuban ni Jesus si Pedro, Santiago, ug Juan, ug mitungas didto sa Bukid sa Pagkabalhin, ug nagtindog didto ibabaw sa bukid. Ug, si Jesus, giposisyon niadto sa Dios ang Iyang Anak; sama sa gipaninkamotan nako kining... gihisgotan ko niadtong miaging gabii, ang pagposisyon sa anak. Ug sa dihang didto na sila, mitan-aw sila sa palibot ug nakita nga atua didto nagtindog si Moises ug si Elias. Nag-istoryahanay sila, nagapakig-fellowship. Dili nga gamay’ng bandila naglutawlutaw didto, o gamay’ng puti nga mga panganod, diay, nga nagalutawlutaw sa palibot. Kondili mga tawo sila, nga nag-istoryahanay. Niadtong panahona dugay nang nalubong si Moises sa lubnganan nga wamarkahi sulod sa walo na ka gatus ka tuig. Ug dugay nang Mipauli si Elias sakay sa usa ka carro, lima na ka gatus ka tuig. Ug ania silang duha, nga buhi sa gihapon sama sa kung unsa sila ka buhi kaniadto, nagtindog didto nga nagapakig-istorya Kaniya sa wala pa Siya

mopadulong sa Kalbaryo. Alleluyah! “Selyado na hangtud sa adlaw sa atong katubsanan!”

¹⁶⁴ Dalion ko na, ug dayon tapuson na nato tungod kay gabii na kaayo, ug mangamuyo pa kita para sa mga may sakit, mga lima pa ka minuto. Ika-14 nga bersekulo, basaha, tugoting basahon ko ang ika-13, kuhaon, ang basihan.

*Nga kaniya kita...nagsalig, human nga nadungog
ninyo ang pulong sa kamatuoran, ang maayong balita
sa inyong kaluwasan:...*

¹⁶⁵ Karon nahinumduman n'yo ba, kung unsa ang kaluwasan nga aduna sila? Sila'y—sila'y mga Cristohanong Taga-Efeso. Sila, karon tan-awa ninyo, namatikdan ba ninyo ang mga taga-Corinto? Kinahanglan niya kanunay'ng sultihan sila, “Sa dihang moabot ako sa inyo, ang usa adunay pagsulti'g ubang pinulongan, ang usa adunay pagsulti'g ubang pinulongan, ang usa adunay panag-awit, ang usa adunay pagpropesiya, ang usa adunay...” Kita n'yo, wala siya'y puedeng itudlo kanila, tungod kay kanunay man silang naninguha *niini*, *niana* o *uban pa*. Kining mga taga-Efeso aduna usab og mao rang butang, apan aduna sila niini diha sa kahan-ayan. Wala niya gitudloan ang mga taga-Corinto og bisan unsa man nga sama niini, dili gyud niya mahimo, wala man gud sa kahan-ayan ang iglesia aron maitudlo kini. Karon, mahimo niyang itudlo sa niining mga taga-Efeso ang tinuod nga butang.

*...nga, sa inyong kaluwasan: nga kaniya usa
human...mingtoo kamo, kamo giselyohan sa balaang
Espiritu sa saad,*

*Nga mao ang patinga...(Oh, dili ko unta kana
malagpasan)...ang patinga sa atong panulondon
hangtud...makapanag-iya na kita niini, alang sa
pagdayeg sa iyang himaya.*

Whew!

¹⁶⁶ Unsa man ang Espiritu Santo? Bueno, kung ingon-ana basahon nako ang uban pa niini sa ingon kadali kung makapailub pa kamo uban kanako sa ingon niini kadugay. Asa na gani kita sa miaging gabii, Igsoong Mike? Kon diin silang tanan malipayon, oh, silang tanan malinawon, hingpit nga gugma kadto. Karon, sa matag higayon nga nagapaingon ka *niining* direksyon medyo nagapaubos ka nga, nagapaubos. Sa matag tikang nimo, nagapaduol ka og pipila ka pulgada. Pagdapat mo sa yuta, aduna ka na og landong sa landong sa landong sa mga landong. Karon, ingon niana pa kadaku nga Balaang Espiritu ang anaa kanimo. Gugma na kana. Apan, oh, aduna ka'y gikauhawan.

¹⁶⁷ Oh, dili ba ang mga tawo sama sa mga tigulang, tigulang na nga mga tawo...Daw sa unsa ko ka gustong mobalik ug mamahimong kinse anyos pag-usab, o baynte! Oh, ihatag ko ang

tanang. Unsa man diay ang kaayohan nga mahimo niini kanako? Mamahimo man akong kinse anyos ug mamatay gihapon karong gabhiona. Wala gyud kini kasiguradohan. Unsa kaha kung kinse anyos ka karong gabhiona, unsa ka kasigurado diay nga si mama buhi pa, pag-uli nimo, o dili na? Unsa ka kasigurado diay nga makapauli ka pa? Unsa ka kasigurado diay nga mabuhi ka pa ugma bisan dose anyos ka pa, hingpit ang pagkahimsog? Mahimo kang mapatay sa usa ka aksidente, nagbuy-od nga patay na, bisan unsay mahimong mahitabo kanimo. Wala gyu'y kasigurohan, kita n'yo. Wala'y butang nga sigurado dinhi. Apan nagapangandoy kita alang niana. Unsa man kini? Kini mao Kanang atua sa itaas Didto nga nagahatag sa inyo og kahinam para niini.

¹⁶⁸ Karon, kung nagalakaw kamo pasulod Niini, nan aduna kamo'y Kinabuhing Walay Katapusan. Karon unsa man ang nagapahinabo niini? Kini mao ang "patinga."

¹⁶⁹ Unsa man ang patinga sa unsa mang butang? Kung moadto ko kanimo aron mopalit og awto, moingon ko, "Tagpila man ang maong sakyanan?"

¹⁷⁰ Moingon ka, "Kini nga sakyanan, Igsoong Branham, nagkantidad og tulo ka libo ka dolyar."

"Pila man ang paunang bayad niini?"

"Bueno, ihatag ko na sa imo sa unang bayad nga lima ka gatus ka dolyar."

¹⁷¹ "Sige, ania ang lima ka gatus ka dolyar. Akong—ihatag ko sa imo ang tibuok nga kulang niini sa ubang adlaw, sa mas daling panahon nga mahimo ko. Itagana na nimo sa ako ang sakyanan." Ihatag ko na sa imo ang lima ka gatus ka dolyar, mao kana ang patinga. Husto ba kana?

¹⁷² Karon, kuptan mo na kana, kana ang "patinga," kana ang "unang bayad."

...human nga kamo *giselyohan* pinaagi sa...
Espiritu sa saad, ang...*Espiritu sa saad*,...human nga
 kamo *giselyohan*...

Nga maoy...

Unsa man? Unsa man ang Selyo sa saad, ang Balaang Espiritu nga saad?

*Nga mao ang patinga sa atong panulondon
 hangtud...makapanag-iya na kita niini...*

¹⁷³ Unsa man kini? Kini ang unang bayad. Ug, igsoon, oh, oh, oh, oh, oh, mga magwawali! Kung kini mao ang unang bayad, unsa pa kaha ang mahitabo pag didto na kitang tanang! Mamahimong unsa na kaha? Kung kini mao ang...Kung ingon niini ang natagamtam nato karon, ug nalipay na kaayo kita hangtud

nga . . . nakakita na ako og mga lalaking nobenta anyos nga basta na lang . . .

¹⁷⁴ Nakita ko ang usa ka tigulang na nga magwawali nga nagtindog usa niana kagabii. Miadto siya, ang ingon niya . . . Sama *niini*, nga miadto siya sa entablado. Ug miingon ako, “Mowali ba kanang tigulang nga lalaki?”

¹⁷⁵ Ingon siya, “Bueno, dalaygon ang Ginoo.” Usa ka tigulang nga itum nga lalaki, nga sul-ob kanang daku og daan na nga taas nga amerikanang pang-magwawali.

¹⁷⁶ Ingon ko, “Nganong dili na lang kanang batan-ong mga magwawali ang ipawali? Kanang tigulang nga lalaki, unsaon pa kaha niya pagwali?”

¹⁷⁷ Ingon niya, “Bueno,” ingon pa niya, “mga igsoon,” ingon niya, “kaganina ko pang nadungog ang mga igsoon nga nagwali tibuk adlaw,” ingon niya, “mahitungod sa mga gibuhay ni Jesus sa dinhi pa Siya sa yuta. Isulti ko pud sa inyo kung unsa ang gibuhay Niya didto sa Langit.” Ingon niya, “Kuhaon ko ang akong tekstong karong gabhiona gikan sa Job 7:27,” miingon, “kaniadto sa wala pa ang pagkatukod sa kalibutan,” miingon, “sa dihang giingon Niya niadtong nagakadungan pag-awit ang mga bitoon sa kabuntagon ug ang mga anak sa Dios nagkaduyog sa pagsinggit sa kalipay.” Nagsugod siya nga ingon niana. Miingon, “Kabalo kamo niini, adunay nahanabo kaniadto.” Miingon siya, “Abi ninyo . . .” Ug nagsugod siya’g hisgot kung unsa ang nahinabo kaniadto sa Langit. Gihiisgotan niya kadto paingon sa pinahigda nga balangaw hangtud sa ikaduhang Paganhi. Niadtong higayona, mikunsad ang Espiritu Santo diha kaniya. Abi ninyo, gikinahanglan pa nila nga agakon kadto nga tigulang pasaka didto, mga nubentay-singko anyos na man gud siya. Mora ba siya’g ingon *niini*, nagtikuko na, ug may diyutay pang buhok sa kilid, kabalo na mo, nga sama *niini*. Miadto siya didto ug nagsugod siya’g wali, miingon, “Whoopee! Alleluyah! Himaya!” Nagluksolukso nga sama niana. Miingon, “Oh, wala kamo’y igong lawak dinhi alang kanako aron magwali.” Ug mikanaug, didto sa salog nga ingon niana, sa ingon ka paspas nga mahimo niya. Ug pasiuna pa lang kadto. Oh!

¹⁷⁸ Unsa ba ang ginabuhay sa Balaang Espiritu? Oh, ania ang usa ka maanindot nga dapit, tugoting basahon nako ang unang bersekulo sa sunod nga kapitulo. Mahimo pa ba? Okey lang ba kana? Moingon og, “Amen.” [Nagaingon ang kongregasyon, “Amen!”—Ed.] Sige, ang unang bersekulo sa ikaduhang kapitulo, dayon. Paminaw:

Kamo, nga mga . . . kamong . . . Ug kamo iyang gihatagan og kinabuhi, nga mga kaniadto . . . patay pa tungod sa mga kalapasan ug mga kasal-anan:

¹⁷⁹ “Kamo nga Iyang gihatagan-og-kinabuhi.” Unsa ba ang buut ipasabot sa *gihatagan-og-kinabuhi*? “Gibuhi.” Nga mga

halos patay na unta, apan Iya kamong gihatagan-og-kinabuhi pinaagi og pasiunang bayad. Unsa pa kaha kung inyo—kung inyo na gyud makuha ang tanan nga dibidendo? Oh! Dili ikatingala si Pablo, nga gisakgaw ngadto sa ikatulong langit, miingon, “Wala makita sa mata; wala hidunggi sa dalunggan; ni misantop sa sulod, misantop sa kasingkasing sa tawo, kung unsa ang ginaandam sa Dios alang kanila (gitagana na) nga nahigugma Kaniya.” Pagkamaanindot pagmahitabo na kana! Kalipay nga dimaasoy ug puno sa himaya ang ginahisgotan dinhi! Whew! Uhm! Kamo nga mga patay kaniadto tungod sa kasal-anan ug kalapasan nga karon mga gibuhi na Niya pinaagi og landong sa landong sa mga landong. Unsa na kaha pag nahiadto ka na sa landong sa mga landong pasulod nga pasulod pa sa landong, sa landong nga human niini paingon na sa sapa, dayon gikan sa sapa padulong sa suba, gikan na usab sa suba padulong na sa kadagatan?

¹⁸⁰ Ug unsa pa gyud kaha sa dihang atua na kamo sa pagtubos, nga aduna na’y usa ka bag-o kaayong lawas, nga mibalik na pag-usab ngadto sa pagkabatan-ong lalaki, o ngadto sa pagkabatan-ong babaye, nga dili na gyud mamatay pa? Ug modungaw kamo sa yuta, ug maghunahuna, “Malipay akong mokaon didto og pipila ka ubas ug moinom og mabugnaw nga tubig, apan, kabalo mo, dili na nako kana kinahanglan dinhi. Apan moabot si Jesus sa umalabot nga adlaw, ug kining langitnong lawas, kining theophany nga gipuy-an nako . . .” Dili na magsumikad pa pinaagi sa tagoangkan sa usa ka babaye, dili na kini magsumikad pa pinaagi sa pangibog sa pagpakighilawas; Apan tungod kay natawo si Jesus nga dili pinaagi sa pangibog sa unodnong-pagpakighilawas, Pagabanhawon ako nga dili na pinaagi niini, ug magsulti Siya sa umalabot nga adlaw ug ang mga patay diha kang Cristo mangabanhaw, ug ang lawas nga kaniadto akong gipuy-an mabanhaw diha sa gihimayang lawas, ug maglakaw ako ug magsulti ako, ug magkinabuhi ako ug magkalipay ako (alleluyah), Mabuhi ako sa mga Walay Katapusang kapanahonan nga moabot, kang Jesus Cristo nga atong Ginoo. Whew! Ania na, igsoon, mao kana ang Maayong Balita!

¹⁸¹ “Tungod niini ako usab,” ginasulti ni Pablo dinhi karon kung unsa siya. Basahon ko ang uban pa niini ug dayon mag-ampo na kita para sa mga masakiton. “Hangtud sa pagpanag-iya, kini mao ang patinga hangtud sa maong pagpanag-iya, sa pagdalayeg sa Iyang himaya.”

Tungod niini ako usab, sa pagkadungog sa inyong pagtoo (nadungog ko nga nagatoo kamo niining butanga, nadungog ko nga mitoo gyud kamo sa predestinasyon, sa Kinabuhing Walay Katapusan, ug sa kaluwasan, ug uban pa) sa Ginoong Jesus, ug sa gugma nga inyong gipakita sa tanan . . . sa mga balaan,

Wala ako mag-undang sa pagpasalamat tungod kaninyo, nga gilakip ko kamo sa akong mga pag-ampo;

Aron ang Dios sa atong Ginoong Jesus Cristo, ang Amahan sa himaya, magahatag kaninyo sa espiritu sa kaalam ug sa pinadayag...kahibalo mahitungod kaniya: Padayon mismo nga ginapadayag ang Iyang Kaugalingon sa inyo sa tanang panahon, sa pagtubo gikan sa grasya ngadto sa grasya, gikan sa gahum ngadto sa gahum, himaya ngadto sa himaya. Dili mosibog; ug, kondili gikan sa himaya ngadto sa himaya, nga nagpadayon gayud. Padayon ko kamong iampo.

Ang mata—ang mga mata sa inyong panabot... .

¹⁸² Hum! Kabalo mo, gisulti sa Biblia nga nabutahan kamo kaniadto ug wala ninyo hingbaloan kini. Apan ania miingon si Pablo, “Magaampo ako nga ang mga mata sa inyong panabot...” Nakasabot kamo pinaagi sa inyong kasingkasing. Mao kana ang iyang ginahisgotan. Nagatan-aw kamo pinaagi sa inyong mga mata, apan nakita ninyo pinaagi sa inyong mga kasingkasing. Kabalo na kamo niana. Sige. “Nga ang Dios sa Himaya...” Tan-awon nato, ang—ang ika-18 nga bersekulo.

Sa malamdagan ang mga mata sa inyong kasingkasing; aron inyong hingbaloan kong unsa ang inyong paglaum sa iyang pagtawag, ug kung unsa ang mga pagkadato sa...himaya sa iyang panulondon diha sa mga balaan,

Ug kung unsa kadtong labaw gayud nga pagkadaku sa iyang gahum alang kanato...(whew! Gisulti nila nga wala na kono ang gahum? Wala pa gani miabot ang maong gahum)...nga mingtoo, sumala sa buhat sa kusog sa iyang gahum, (Kamo nga nanagtoo sa buhat sa kusog sa Iyang gahum, hingpit nga ginaampo ko nga igabubo sa Dios ang Iyang gahum nganha kaninyo. Kita n’yo?)

Nga iyang gibuhad diha kang Cristo, sa pagbanhaw kaniya gikan—kaniya gikan sa mga patay, ug nagpalingkod kaniya sa iyang toong kamot sa...mga dapit nga langitnon,

Sa ibabaw sa...mga pamunoan,...mga gahum,...pagbulot-an,...kaginohoan, ug nianang tanan nga ngalan nga ginanganlan,...

¹⁸³ Oh, oh, oh! Pasay-...Dili, mas maayo pa nga dili na. Siguradong maigahin nato ang nahabiling oras sa gabii mahitungod niana.

...sa tanan nga ngalan nga ginanganlan, dili lamang niining panahona sa kalibutan, kondili didto sa kalibutan nga umalabot:

¹⁸⁴ Unsa man ang matag—unsa man ang ngalan sa matag ngalan? Ang matag ngalan sa matag tawo magadala sa Ngalan nga unsa? [Nagaingon ang kongregasyon, “Jesus.”—Ed.] Ang tibuok Langit gipangalanan og Jesus. Ang tibuok Iglesia gipangalanan og Jesus. Ang tanantanan gipangalanan og Jesus, tungod kay Kini ang bugtong Ngalan nga nagkaaduna ang Dios. Gitawag Siya nga Jehovah: Jehovah-jireh, ang inandam nga Halad nga iya sa Ginoo; Jehovah-rapha, ang Ginoo nga nagaayo kaniyo; Jehovah, ang bandila sa Ginoo, Manases; ug Jehovah, nagkalainlaing mga Jehovah. Gitawag Siya nga Bitoon sa Kabuntagon. Gitawag Siya nga Amahan, gitawag Siya nga Anak, gitawag Siya nga Espiritu Santo. Gitawag Siya nga Alpha, gitawag Siya nga Omega. Gitawag Siya nga Sinugdanan, gitawag Siya nga Katapusan. Gitawag Siya nga Sanga. Oh, gitawag Siyang . . . Gitawag Siya og tanan na nga klase sa mga titulo, apan adunay Siya’y usa ra ka Ngalan.

¹⁸⁵ Mao kana ang ginahisgotan ni Mateo, sa dihang giingon ni Jesus, “Busa panglakaw kamo ug panudloan ninyo ang tanan nga nasud, bautismohan sila sa Ngalan,” dili sa mga ngalan, “sa Ngalan sa Amahan, Anak, ug Espiritu Santo.” Dili ngalan ang Amahan, dili ngalan ang Anak, dili ngalan ang Espiritu Santo. Titulo ra kini sa usa ka Ngalan. Usa kini ka Ngalan sa tulo ka kinaiyahan nga panag-iya sa usa ra ka Dios. Unsa ba ang Iyang Ngalan? Ang gisulti sa Manulonda, “Pagatawgon mo ang Iyang Ngalan nga . . .” [Nagaingon ang kongregasyon, “Jesus.”—Ed.] “kay Siya magaluwas sa Iyang katawhan gikan sa ilang mga sala.” Mao kana ang hinungdan nga silang tanan nagbautismo kaniadto sa ingon niana nga paagi diha sa Biblia. Sa ingon nianang paagi gibautismohan ni San Agustin ang Hari sa England, mga—mga usa ka gatus ug singkuwenta, duha ka gatus ka tuig human nga namatay si Cristo, sa Ngalan ni Jesus Cristo. Sige.

Sa ibabaw sa . . . pamunoan, . . . gahum, . . . pagbulotan, . . . kaginohan, nga—nga ang tanan nga ngalan ginanganlan, dili lamang niining panahona sa kalibutan, kondili didto usab sa umalabot:

Ug nga gipasakup niya ang tanan nga mga butang sa ilalum sa iyang mga tiil, ug nga gihatagan siya aron mahimong ulo ibabaw sa tanang mga butang sa iglesia,

Nga mao ang iyang lawas, . . .

¹⁸⁶ Karon, kung adunay gahum ang akong lawas sa tanan nga mga butang, nan kung unsa ang lawas ko mao’y kung unsa pud ako. Husto ba kana? Ingon niana kung unsa ako, ingon niana kung unsa ang pagkaila ninyo kanako. Husto ba kana? Bueno, kung ingon niana, ang tanan sa kung unsa ang Dios, gibubo Niya ngadto kang Jesus, kay diha Kaniya nagapuyo sa pagkalawas ang bug-os kinatibuk-an sa Pagka-Dios. Husto ba kana? Ug ang

tanang kung unsa si Jesus, gibubo Niya ngadto sa Iglesia, “Kining mga butang nga Akong ginabuhay, inyo usab pagabuhaton ang tanang butang. Labaw pa gani ang inyong pagabuhaton, kay moadto man Ako sa Amahan.”

Nga mao ang lawas niya, ang kahupnganan niya nga nagapuno sa tanan diha sa tanan.

¹⁸⁷ Oh, daw sa unsa ko ka gusto kana! Gusto ko kaayo kana! Ginabasa nako sa miaging adlaw ang usa ka libro nga gisulat mahitungod sa biyahe nga akong gipahigayon kaniadto aron magministerio—aron magministerio sa Africa. Wala ko pa man gud kadto nabasa. Pila na ba ang nakabasa sa maong libro, *Prophet Visits Africa?* Dinha nasulat nga ginatan-aw ko kaniadto ang usa ka gamay’ng lalakeng Indian. Pila ba ang nakakita na nianang litrato?

¹⁸⁸ Nadungog ko ang usa ka ebanghelista, nga dugay nang nagapang-ampo alang sa mga masakiton sulod sa mga kinse katuig o sobra pa, ingon niya, “Wala pa ako sukad nakakita og milagro nga nahimo sa tibuok kong kinabuhi.” Ingon niya, “Nakakita na ako og mga tawong nagsulti nga nagasakit ang ilang ulo, nga nangaayo. Nakakita na ako og mga tawong nagsakit ang ilang mga tiyan, nga nangaayo, ug uban pa. Pero ang milagro, usa ka butang nga nagamugna ug nagahimo og...”

¹⁸⁹ Nahunahuna ko nga atua unta kining lalaki didto ug nasaksihan unta kadto. Kadtong batang Indian nga ang bitiis niini mga *ingon-ani* ra kadaku, ang usa sa mga bitiis niya. Ang usa ka bitiis normal ra sama sa natural nga bitiis sa tawo. Ug, kung nakabantay mo, ang iyang panukod, aduna siya’y sapatos nga mga katorse ka pulgada o kinse ka pulgada ang taas, nga sama niini. Aduna siya’y manipis nga puthaw’ng tumbanan sa ilalum niini. Nakatungtong ang sapatos niya niadto nga may duha ka taas nga tukod-tindogan. Nagpaduol siya kung asa ako nagtindog, gidala nila siya didto itaas sa entablado. Aduna siya’y duha ka sungkod. Gitikang niya kining daku nga puthaw’ng sapatos ug gitamak niya kini nga ingon niana. Gitan-aw nako ang iyang bitiis, mga *ingon-ana* lang kadto kadaku.

¹⁹⁰ Bueno, Mohammedan sila nga mga tawo, mga Mohammedan. Nadumduman n’yo pa ba niadtong miaging Domingo sa dihang gibasa nako sa inyo kung unsa ang gisulat sa mga mantalaan? Gigunitan ko kini dinhi mismo, nga gikan pa sa Africa, nga gipadala sa ako sa atong nakabalik nga misyonaryo, si Igsoong Stricker. Adunay artikulo niadto kung unsa nga miatras kono didto si Billy Graham. Mismo. Gipasagdan nila ang mga Mohammedan nga itulod sila paingon sa dagat. Unsa man ang nahitabo? Nanggibiya na ang mga misyonaryo sa pagpangmisyon. Unsa pa man diay ang kapuslanan sa ilang pagpabilin pa? Nangaparot man sila.

¹⁹¹ Mahal ko si Billy Graham, ug sa tan-aw ko talagsaon siya nga tawo sa Dios. Apan ang angay unta nga itubag ni Billy Graham, ingnon, “Kadali lang...” kung gitugotan lang unta siya niining pipila ka pormal nga mga Baptist nga buhaton kadto, siguro nabuhat na unta niya kadto. Nagatoo ko nga usa ka tawo sa Dios si Billy Graham. Apan kung gisulti lang unta niya, “Kadali lang! Usa ako ka ministro sa Ebanghelyo. Nagatoo man ka kamo sa Daang Tugon, ug gisulti mo nga si Jesus usa lang man ka tawo. Ginahagit ko ikaw sa usa ka debate.” Wala ako nagatoo sa pagdawat sa mga hagit sa yawa, wala sir, apan mahimong gisumbalik ko ang maong hagit kaniya, ug moingon, “Mag-atubang kitang duha. Doktor ako sa Dibinidad,” si Billy Graham man gud usa ka Doktor sa Dibinidad, “tugoting hagiton ko ikaw niining butanga, ug tugoting pamatud-an ko kanimo nga si Jesus mao ang Cristo. Bueno, kung bahin sa Balaanong pagpang-ayo, wala ako niana nga mga gasa, apan aduna kami og pipila ka mga igsoong aduna niana. Karon, kung gusto ninyong dalhon sila nga mga tawo dinhi, tugoti kong tawgon lang ang usa kanila, si Oral Roberts o kinsa man, usa ka tawo nga adunay halangdong ministerio nga siguradong makaadto gyud didto.” Paadtoon didto, ug dayon saksihan kung unsa ang mahinabo, moingon, “Ang Cristianismo dili ingon niana sa kung unsa ang imong gihunahuna.”

¹⁹² Karon pagkapakyas ang gibati sa tanan tungod kay basta na lang siya miatras ug gibiyaan kadto. Siyempre, karon, dili ko motoo nga manghagit kanimo ang yawa. Nalud-an ko na pud ang iyang nawong nga sama niana, ug gitalikdan siya. Husto kana. Apan sa dihang moabot na sa punto kon diin... Ang gibuhat unta ni Billy—nabuhat na unta niya nga ipabati sa maong Mohammedan nga kini gamay’ng sagbot lang nga sama *niana*. Gikuha unta niya ang Biblia ug gigamit ang Isaias 9:6, ug moingon, “Kinsa man ang iyang gihisgotan, ‘Kay alang kanato ang usa ka Bata natawo, alang kanato ang usa ka anak nga Lalaki gihatag’? Kinsa ba kini nga Tawo? Kinsa ba Kini nga iyang ginahisgotan? Kinsa ba kini nga Propeta? Kinsa ba kini nga Mesias nga moabot? Ipakita sa ako kon diin Niya gipatungha ang Iyang Kaugalingon diha kang Mohammed. ‘Gisamaran Siya tungod sa atong mga kalapasan, napangos tungod sa atong kasal-anan, ang silot sa atong pakigdait diha sa ibabaw Niya, tungod sa Iyang mga labod kita nangaayo.’ Ipakita kini sa ako nga anaa kang Mohammed kana. Giunsa ba Niya pagtuaw, ‘Dios Ko, Dios Ko, nganong gibiyaan Mo Ako? Gipalagbasan nila ang Akong mga kamot ug ang Akong mga tiil,’ ug uban pa? Ipakita sa ako gamit ang inyo mismong pulong, diha sa inyo mismong tugon.” Aba, nabuntog na unta niya og ayo kadtong Mohammedan hangtud sa dili na niini mahibaloan kung asa na siya. Husto kana.

¹⁹³ Apan sa dihang gibali sa mantalaan, kadto ang sakit

kaayo, kadto ang nagpaukyab sa akong kasingkasing. Sa dihang giingon niini didto, “Bisan pa nga kinahanglan mosibog si Billy ug moatras, nganong moingon man ang Mohammedan nga sayup kini,” miingon, “sa dihang si Rev. William Branham didto sa Durban, South Africa, sunodsunod kadto nga mga milagro nga dili malalis, Balaanong gahum, sa dihang napulo ka libo nga mga Mohammedan ang dungan nga nanaghapa ug nagsurender sa ilang kinabuhì kang Jesus Cristo.” Sa walay duhaduha. Nasayod sila mismo niini. Silang mga pundamental kabalo bahin niini. Ayaw ko’g sultihi.

¹⁹⁴ Usa niana ka higayon adunay tawo nga miduol kang Jesus, miingon, “Rabbi!” Kabalo na mo nga usa kadto ka Fariseo. Miingon, “Kabalo kami nga Ikaw usa ka Magtutudlo nga gikan sa Dios. Kabalo kami niini. Nasayod kami niini, tungod kay walay tawo ang makabuhat niining mga butanga nga Imong ginabuhat gawas ang Dios nagauban kaniya. Nasabtan gyud namo. Kabalo kami niini. Apan dili lang namo kana puedeng ipahayag, kita mo, tungod kay kung buhaton namo, bueno, palagputon kami sa among iglesia. Kita mo, mawad-an man kami og dungog.” Ug busa miingon si Jesus, nagsugod nga isulti sa iya nga kinahanglan niya nga maipanganak pag-usab.

¹⁹⁵ Bahin niadtong batang Mohammedan, sa dihang nagtindog siya didto, anaa ang iyang litrato. Dili gyud mamakak ang kamera. Atua siya nga nagatindog, nga mubo kaayo ang usa ka bitiis (mga katorse pulgada) kaysa laing usa, nagtindog didto nga gamit kadtong puthaw’ng sapatos. Gisultihan siya, miingon ko, “Makasulti ka ba’g Iningles?”

¹⁹⁶ “Dili, sir.” Dili siya makasulti sa Ingles. Ingon sa interpreter, “Dili siya makasulti og Ingles.”

“Unsa kadugay kang ingon na niana?” Gipangutana siya sa interpreter.

“Sukad pa sa pagkatawo.”

“Mahimo mo ba nga ilihok man lang ang imong bitiis?”

“Dili gyud, sir.”

“Nagatoo ka ba kang Jesus Cristo?”

Miingon, “Usa ako ka Mohammedan.”

Ingon ko, “Dawaton mo ba si Jesus Cristo kung ayohon ka Niya?”

¹⁹⁷ “Dawaton ko si Jesus Cristo ingon nga akong Manluluwas kung pagaayohon Niya ako.”

¹⁹⁸ “Kung pagaayohon Niya kana, nga mamahimong pareho na sama nianang usa nga normal nga bitiis, dawaton mo ba Siya?”

“Dawaton ko.”

¹⁹⁹ “Bueno, Dios, unsa man ang Imong buhaton?” Kana na ang sunod nga butang; gitubag na niya ang tanang pangutana.

Igsoong Mike, ingon niana ang gibati ko. Naghulat lang ako kadali aron tan-awon kung unsa ang isulti sa Dios. Milantaw ako didto ug nakita ko ang maong bata nga, naglakaw na, nga mora og didto sa kilid sa mga bongbong nga sama niana. Ingon ko, “Pila ba sa inyo nga mga Mohammedan ang modawat niini? Ania ang usa ka batang Mohammedan, tan-awa ninyo siya, patindoga siya dinha.” Ingon ko, “Kamong mga doktor, gusto ba ninyo siyang susihon? Atua siya nagatindog.” Oh, mahibalo ka kung asa na gyud ka kung ingon-ana. Kita n’yo, kabalo ka na kung asa ka nakabarug. Wala ni kinsa man . . . Atua mismo siya.

²⁰⁰ Ingon ko, “Lakaw ka paingon dinhi, anak.” Ug gigunitan nila siya, ania na siya nga nagaduol. (“Ta-lump, ta-lump.”) Ingon ko, “Mora’g mga dose, katorse pulgada kadto ka mas mubo. Mga mora’g ingon gyud *niana*.”

“Oo.”

²⁰¹ Ingon ko, “Pero mahimo siyang ayohon ni Jesus Cristo nga Anak sa Dios. Motoo ba kamong mga Mohammedan niini ug dawaton Siya ingon nga personal n’yong Manluluwas?”

²⁰² Adunay linibo niadtong mga itum nga kamot ang nagpataas nga sama niana. “Bueno, Ginoo, mao na kini ang oras.” Ingon ko, “Langitnong Amahan, kung Ikaw man nagatubag kaniadto pa, tubaga usab ako karon, para kini sa Imong Kahimayaan, para kini sa Imo. Nagapangamuyo ako Kanimong ayoha kining bata.” Nag-ampo lang ko para kaniya nga ingon niana.

²⁰³ Ingon ko, “Tangtanga ang imong sapatos.” Gitan-aw ako nga may pagkatingala, niadtong interpreter. Ingon ko, “Tangtanga ang imong sapatos.” Gitangtang niya ang liston niini. Tungod kay nakita ko na man kadto sa panan-awon, kung unsa mismo ang mahitabo. Iyang gitangtang kadtong sapatosa. Sa dihang gisul-ob niya kadto balik ug naglakaw padulong kanako, ang parehong bitiis nahimo nang normal, tungod kay pareho na kadtong nagalakaw nga mora og bag-o. Ingon ko, “Gusto ba nimong maglakaw-lakaw?”

²⁰⁴ Nagsugod siya nga mihilak nga sama niana, nga naglakaw-lakaw, wala siya kabalo kung unsay buhaton. Sa paglakaw-lakaw niya nga ingon niana, miingon siya, “Oh Allah! Allah!”

Ingon ko, “Jesus! Jesus!”

Oh, oh, oh! “Oh Yesu! Yesu,” pagkahuman. “Yesu! Yesu,” nga sama niana.

Ingon ko, “Aduna pa ba’y mga pagduda, o unsa mang pagduda?”

²⁰⁵ Si Julius Stadskev, pila ba ang nakaila kaniya? Si Igsoong Stadskev nga nakatambong na dinhi sa iglesia; nga—nga bag-ohay lang nakaadto sa Germany. Miingon, “Kadali lang, Igsoong Branham, kadali lang.” Dalidaling gidala ang usa ka litratista. “Mahimo ba nga makuhaan nako siya og litrato?”

Ingon ko, “Sige lang.”

206 “Lakaw ka paduol *dinhi*, dalha *dinhi* ang imong sapatos.” Nagtindog siya nga ingon niini, gikuhaan og litrato ang maong bata, nga pareho na ang mga bitiis og ingon ka normal ug tul-id na gyud kaayo. Atua ang iyang daang sapatos ug panukod, nga ingon *niana*, ingon *niana*.

207 Ingon ko, “Pila sa inyo nga mga Mohammedan karon ang mosalikway kang Mohammed ingon nga usa ka propeta, ug motoo kang Jesus nga Anak sa Dios, ug dawaton Siya ingon nga inyong personal nga Manluluwas?” Napulo ka libo nga mga kamot ang mipataas. Alleluyah! Ayaw na nila sa usa ka . . .

208 Gipaningkamotan nila kini nga pugngan, tungod kay mga “holy rollers” kono kita, maoy tawag nila sa ato, nakita n’yo. Sa gihapon, nagapanglihok ang Dios. Gipahimutang na Niya sa hustong posisyon ang Iyang Iglesia. Ginahimo Niya sa labing, madagayaon gayud nga labaw pa sa tanan nga atong mabuhat o mahunahuna. Ingon Siya ka Dios sa gihapon karong gabhiona sama sa kung unsa Siya kaniadto.

209 Busa, suod kong mga higala, sultihan ko kamo sa usa ka butang karon mismo. Akong pinangga bililhong katawhan, kamong mga ania karon, ug sa uban pa nga nagapaminaw sa teyp nga atua sa gawas-nasud ug kung asa man kamo, ayaw kamo og kahadlok. Okey ra ang tanan. Ang Amahang Dios, sa wala pa ang pagkatukod sa kalibutan, nahibaloan na ang tanantanan nga mahinabo. Ang tanang mga butang nagpanglihok sa eksakto gayud. Gihigugma ba ninyo Siya? Padayona ninyong tul-id ang inyong kasingkasing.

210 Ug, hinumdumi, sa dihang mobugto na ang gininhawa gikan sa niining kinabuhia, sa inyo nga mga tigulang na o sa inyo nga mga batan-on pa, ug kaninyong mga inahan, sa dihang makita ninyo ang inyong gagmay’ng mga masuso, kanang gamay’ng masusong babaye nga namatay sa dihang walo pa lang siya ka adlaw o lima ka adlaw pa lang, mamahimo siyang usa ka maanyag nga batan-ong babaye sa dihang makita mo na siya. Kanang tigulang nga Lolo nga nagtikuko na kaayo, nga halos dili na gani niya makita kung asa siya padulong; sa dihang makita mo na siya, lola, usa na siya guwapo kaayong batan-ong lalaki, ingon ka batan-on na nga mga baynte anyos ang panuigon, nga anaa sa iyang kausbongan sa pagkabatan-on. Ug mahimong ingon na niana siya hangtud sa kahangturan. Mahikap mo ang iyang kamot, malamano mo siya. Magakus mo siya, pero dili na siya ingon nga “bana,” usa na siya ka “igsoon.” Oh, grabe! Mahimong mas labaw pa siya kay sa ingon nga “bana.” Sa hunahuna mo ba nga gimahal mo siya? Siguradong gimahal mo gyud siya. Pero kana’y *phileo* ra; hulata ra pagmadawat mo na ang *agapao*. Hulata ra pagmoabot na ang tinuod nga Balaanong gugma, ug dayon makita mo kung unsa. Kining ania dinhi sama

ra sa kanhi nang nag-aso nga basurahan, dili gyud maayo, wala gyud og unsa man nga kaayohan kini. Ang bugtong butang nga ikatambag ko nga buhaton ninyo karon, mao kini, akong—akong—akong mga higala. . .

²¹¹ Pagkataudtaud unya akong. . . Gusto ba ninyo nga hisgotan ko silang duha pa ka mga kapitulo sa ubang higayon na lang? Ang Ginoo. . . Ako—nagkinahanglan ko nga magpahulay usá og diyutay sa dili pa ang Chautauqua. Karon, dili nako puedeng iwali ang ingon niining mga butang sa ingon nianang mga panagtigum. Aduna man gud og daghan kaayong-. . . daghan kaayong nagkalainlaing mga pagtoo didto. Nakita n'yo? Kini mao'y para lang sa iglesia dinhi. Kita n'yo? Dili nako. . . May katungod akong iwali dinhi kung unsa ang gusto nako. Kini ang akong tabernakulo, kita n'yo, ug isulti nako sa inyo. Karon, nagatoo ko nga luwas sila nga mga tawo. Oo, sir, tinuod nga nagatoo ako niini. Pero, oh, mas ganahan kang molakaw ilabina kung kabalo ka kung asa ka nagalakaw. Mas ganahan ka, kung nakahibalo ka, kung nahibaloan mo kung unsa ang imong ginabuhay, nakita n'yo, kaysa magsusapinday-pinday, magkapandol-pandol. Magtindog mismo kita diha sa Kahayag, ug maglakaw diha sa Kahayag ug nahibalo kung asa ka padulong. Tinuod kana. Ang Ginoo magauban kaninyo.

²¹² Ug kung ang matag usa sa inyo dinhi karon wala pa gayud napahiluna sa hustong posisyon! Mahimong ikaw usa ka simpli ra nga asawa. Bueno, moingon mo, “Igsoong Branham, wala pa gyud ko'y nahimo sa akong kinabuhi. Dili man ko usa ka magwawali.” Bueno, siguro gidala ka dinhi sa Dios aron mapadaku mo ang imong mga anak sa imong pamilya, gikan nianang mga anak sa imong pamilya mahimong magkaaduna og usa na usab ka pamilya sa mga anak nga mamahimong usa ka magwawali nga magdala og milyon ka mga kalag ngadto kang Cristo. Mao nga kinahanglan kang maania dinhi. Ania ka dinhi tungod sa usa ka katuyoan. Kabalo ba mo niana?

²¹³ Bueno, moingon mo, “Ang mahimo ko lang gayud, maoy, magbugwal niining yuta. Ug mobiya ako, nga halos gabii na ko makauli, wala na ko'y kahibalo kung unsaon sa pagpangita og panginabuhay aron mabuhi ang akong mga anak. Pagmakita ko ang mga makalolooy'ng gagmay kong mga anak nga walay masuk-ob nga mga sapatos. Molingkod na lang ako ug mohilak. Aduna ako'y karaang sakyanan, ug mosimba ako ug si Mama.” Ayaw kabalaka, igsoon. Padayon mo lang Siya nga higugmaon, aduna Siya'y katuyoan para kanimo. Magpabilin ka lang mismo sa kung unsa ka, magpadayon lang. Kita n'yo? Wala man ka'y nawali og bisan usa ka sermon, pero posibli nga mamahimo kang apohan-sa-tuhod sa usa nga siyang magbuhay niana.

²¹⁴ Kabalo ba mo nga gipasidunggan sa Dios (Tan-awon daw nato karon, kung unsa ba gyud ang iyang ngalan?) si Levi, nga nagbayad og ikapulo sa dihang atua pa siya sa bat-ang ni

Abraham, sa dihang natagbo kini ni Melquisedec? Pila ba ang nakabalo niana? Ug tan-awon nato. Kang Abraham natawo si Isaac, kang Isaac natawo si Jacob, kang Jacob natawo si Levi; nga mao ang amahan, apohan, apohan-sa-tuhod; sa dihang atua pa siya kaniadto sa bat-ang, nga atua pa sa semilya sa iyang apohan-sa-tuhod, giisip siya sa Biblia nakabayad na og ikapulo ngadto kang Melquisedec. Grabe, grabe, grabe, grabe gyud! Igsoon! Oh! Akong. . .

²¹⁵ Adunay usa ka gamay'ng—adunay usa ka gamay'ng Taga-Inglatera nga nakabig didto usa niana ka gabii sa England, miingon siya, “Malipayon gyud ko kaayo! Malipayon gyud ko kaayo!”

²¹⁶ Oo, malipayon gyud kaayo ko sa pagkahibalo nga kana tinuod! Ug usa sa niining mahimayaong adlaw, wala ko kabalo kung kanus-a mahitabo kana, apan kung kadto man usa ka panan-awon, dili ko masulti kung ania ako dinhi kaniadto. Hinumdumi, kanunay'ng ibutang kini sa inyong hunahuna, ang mga nagguni sa mga teyp ingon pud unta niana. Kung atua man ako sa usa ka panan-awon, o ang Espiritu kaha ang nagdala kanako, wala ko kabalo. Apan tinuod kaayo kadto ingon nga magunitan nako ang akong Igsoong Neville nga sama *niana*, ingon gyud ka tinuod. Ug mahimo kong tan-awon ug istoryahon kadtong mga tawo. Ug didto nagtindog ang akong unang asawa, wala siya magsinggit og “akong bana,” miingon lang siya, “akong pinangga nga igsoon.”

Atua pud didto ang usa ka dalaga nga ginapangulitawhan nako kaniadto daghan nang mga tuig ang milabay.

²¹⁷ Tingali ang uban sa iyang mga paryente ania karon naglingkod dinhi, si Alice Lewis nga taga-Utica, buutan kaayo, dungganon nga Cristohanong gining. Medyo ulahi na nga nag-minyo sa kinabuhi, ug nanganak sa una niyang bata ug namatay sa pagpanganak. Si Alice Lewis, miadto ako didto sa punerarya aron makita siya. Bag-ohay lang ako nakauli, nabalitaan ko man gud nga patay na siya. Pag-adto ko didto, wala'y tawo sulod sa lawak, miingon ko, “Aduna ba'y babaye dinhi, si Mrs. . . .” Emmerke ang iyang ngalan. Ug naminyo siya sa usa ka buutan nga lalaking Cristohanon, ug buutan siya usab nga babayeng Cristohanon. Nakauban nako ang maong dalaga sa bisan asa na lang, tanan na nga klase sa mga lugar ug tanan na. Ug mga batan-on pa lang kami, mga dise-otso, dise-nuebe anyos, kakuyog-kuyog, buutan nga Cristohanon, wala gyud ko'y ubang nahibal-an kaniya kondili tinuod gayud nga pagka-Cristohanon. Ug makasasala pa ako kaniadto. Pero mokuyog-kuyog ako sa iya. Misulod ako sa . . . Ug ang iyang bana pud usa ka natawo na pag-usab nga Cristohanon, matinud-anong lalaki. Ug wala gani ko kabalo; nabalitaan ko nalang nga patay na siya, nakita ko nalang sa mantalaan. Ug miadto ako ug gisulti nila kanako. Nag-adto

ako didto sa Coots, ug ingon ko, “Aduna ba kamo og usa ka Mrs. Emmerke?”

Miingon kini, “Billy, atua siya sulod sa lawak.”

²¹⁸ Misulod ako ug mitindog didto sa kilid sa iyahang lungon. Nahunahuna nako, “Alice, gikan na ako sa pinakangitngit nga mga bilangoan, nakaagi na ako sa mangitngit nga mga dalan. Ikaw ug ako magkauban nga naglakaw didto sa mga dalan ug mitabok pa gani didto sa suba, niadtong aduna pa sila og mga karaang tiyatrong sakayan, maglingkod kita didto ug maminaw sa pagpatukar nila sa calliope. Magsige kita agi niadtong gamay’ng dalan, pagkatalagsaon nimong babaye! Gipasalamatan gyud nako ang Dios tungod sa imong kinabuhi. Pahulay na, akong pinanggang igsoong babaye, pahulay ka na diha sa pakigdaet sa Dios.”

²¹⁹ Ug sa miaging gabii diha sa usa ka panan-awon, atua siya nga nagdagan padulong kanako. Miingon siya, “Akong bulahang igsoon,” ug gigakus gyud niya ako. Oh, oh, igsoong lalaki ug igsoong babaye, nabag-o gyud ko human niadto. Dili na ako mahimong mao ra sa gihapon tungod niadto. Ingon gyud kadto ka tinuod! Ingon gyud—ingon gyud kadto ka tinuod sama nga nagalantaw ako sa inyo, ingon niana mismo ka tinuod. Busa, wala na ko’y kahadlok. Mamatay man ako sa dili pa matapos ang gabii.

²²⁰ Gusto kong padakuon ang akong gamay’ng bata dinha, si Joseph. Gusto ko siyang makita diha sa pulpito, sa dihang mahimo ko na nga kuhaon kining Biblia. . . pagmoabot na ako sa punto nga makita ko na si Joseph diha sa pulpito nga nagawali ingon nga usa—usa ka batan-ong lalaki nga puno sa Espiritu Santo, nga dinihogan sa Espiritu sa Dios. Ug nagatoo ko nga mamahimo siyang propeta. Niadtong adlaw nga akong—niadtong akong—niadtong akong nakita siya unom ka tuig sa wala pa siya matawo, madumduman ninyo ako nga nagasulti sa inyo nga umaabot na siya. Madumduman n’yo nga gitawag nako siya, dinha mismo kilid sa altar, nga wala ko kahibalo kung unsa ang akong ginasulti, samtang nagahalad ako og mga kabataan, ingon ko, “Joseph, usa ikaw ka propeta.”

²²¹ Ug sa miaging adlaw samtang nagtindog ako didto sa lagwerta, miduol siya kanako, ug ingon niya, “Papa, aduna ba’y kamot si Jesus nga sama sa imo?”

Ug miingon ko, “Bueno, oo, anak. Ngano man?”

²²² Ingon niya, “Naglingkod ako niadto sa akong biseklita, nga nagahulat kang Sarah” iya kanang gamay’ng igsoong babaye, “nga mopauli gikan sa eskuwelahan.” Naglingkod siya didto sa gawas. Wala nako siya gitugotan nga moadto sa kalsada, mao nga naglingkod lang siya niadto nga ingon *niini*. Ug miingon siya, “Nihangad ako, ug,” miingon, “paghangad nako, adunay kamot nga sama sa imoha, nga dunay puti nga manggas nga

migunit kanako.” Ug miingon, “Mipadulong dayon Kadto sa itaas.” Miingon, “Kamot ba kadto ni Jesus nga mipadulong sa itaas?” Gitan-aw ko ang iyang mama, gitan-aw pud ko sa iyang mama. Giadtoan namo si Mrs. Wood. Kung asa man siya karon, ania siya karon nga naglingkod dinhi. Gisukit-sukit namo siyang pangutana, pabalik-balik, ug sa tanang paagi nga mahimo namo. Usa kadto ka panan-awon. Nakita niya mismo kadto. Sa dihang makita ko na ang panahon nga si Joseph nagatindog na nga . . . Nagalaum kong makita ko pa siyang naminyo, kung magdugay pa si Jesus.

²²³ Ug tigulang na ako, ang mga ubanon kong balbas nagbitay na palibot sa akong liog karon. Nakapadala na ako . . . Gusto kong magpadala og duha o tulo ka milyon pa nga mga kalag ngadto kang Cristo kung mahimo pa nako. Determinasyon kong iwali ang Maayong Balita ngadto sa matag suuk sa kalibutan. Oo, sir. Mao nga, tabangi ako, Dios, buhaton ko gyud kini. Busa, sa dihang makita nako nga nagaabot na kana nga panahon, Igsoong Mike.

²²⁴ Makita na nako ang panahon nga si Mama, si Meda, nga mao na ang tawag nako kaniya, akong pinangga, kita n’yo, siya’y . . . nagakatigulang na kami, makita ko ang iyang buhok nga nagkaubanon na, ug makita kami nga papasalop na, nagakahanaw na.

²²⁵ Si Rebekah, mapasalamaton kaayo ko para kang Rebekah. Gisultihan ko sa iyang magtutudlo sa musika niadtong miaging gabii, miingon, “Aba, kung ipadayon lang niya kana, Igsoong Branham,” ingon pa, “lisud isulti kung unsa pa ang arang niyang mahimo.” Kita n’yo, kung magpadayon lang siya sa musika. Gusto nako siya, ug gusto nako pud . . . Gusto nako si Sarah nga anaa sa organ, si Becky sa piano, gusto pud nako si Joseph nga anaa sa pulpito.

²²⁶ Sa dihang makita ko nga nagakahitabo na kana, ug ako ug si Mama paikis-ikis na sa paglakaw, ako nga nagasungkod na lang, usa sa nianang gabii, magalakaw ako dinha sa dalan, ug matan-aw ko sa sulod ug makita ang anak ko nga nagatindog didto dinihogan sa Espiritu Santo, nga ginawali kining mao rang Maayong Balita. Gusto nako gunitan kining daang Basahon, ug moingon, “Anak, ania Kini, sa imo na Kini. Tindogan mo Kini, ayaw gayud pagpakigkompromiso sa usa ka Pulong. Magpabilin ka mismo Niini, pinangga. Dili ka, pasagdi sila, dili ko igsapayan kung kinsa man ang mokontra sa imo, kinsa man ang supak, ang Dios kadapig mo. Iwali nimo ang matag Pulong sa kung giunsa Kini pagsulat Dinha, ug magkitaay mo ni Papa tabok sa suba.” Gusto kong abton ug dalhon ko sa akong mga bukton, ang akong asawa, ug motabok na sa Jordan.

²²⁷ Hangtud sa nianang panahon, Dios, tugoti nga magpabilin pa ako sa pagpangmisyon, nga matinud-anon! Itugot gyud

kanako! Dili ko igsapayan kung unsa man ang baylo niini, o kung unsa man kadaghan, ang kinahanglan kong buhaton, o *niini*, *niana*, o *uban pa*. Itugot kanako nga magpabilin nga maunongon ug matinud-anon sa Pulong sa buhing Dios, aron pag-abot na nianang adlaw ug makatabok na ako didto, ug pagtan-aw ko didto sa tabok ug moingon, “Atua ra. Oh, akong bililhong higala, akong bililhong igsoong lalaki, akong bililhong igsoong babaye.”

²²⁸ Batan-ong magwawali, sudla n’yo ang pagpangmisyon, mag-aktibo sa buluhaton. Kamong tanan nga batan-ong mga magwawali ug mga ingon niana, ayaw intawon kamo paglingkod-lingkod lang. Ayaw intawon kamo pagpuyo ug nga wala’y ginapangbuhat. Pagsangyaw kamo didto ug mangkabig og mga kalag. Paglihok kamo! Adto na, panglihok na. Ayaw pag-undang, dinha batan-ong magwawali. Panalanginan sa Dios ang imong kasingkasing.

²²⁹ Gipahinumdom niya sa ako niadtong anaa pa ako sa ingon nianang edad, siguro, ug tingali mas batan-on pa kay kaniya. Ako kaniadto anaa sa mga baynte anyos og sobra pa niadtong gipahimutang ko kadtong ulohang-bato dinha. Nadumduman ko pa nga nagsul-ob ako kaniadto og bughaw nga amerikana ug usa ka puting pantalon, ug nagtindog ako dinha ug gipahiluna kadtong ulohang-bato mga trayntay-uno na ka tuig ang milabay. Tan-awa kung unsa na ako ka tigulang, batan-on pa lang ako kaniadto. Nagtindog ako mismo dinha, nga gipahiluna kadtong ulohang-bato. Wala gyud ako nagpakigkompromiso bisan sa usa ka Pulong. Gisunod ko Kini nga eksakto gayud kung giunsa ko pagpahiluna ang ulohang-bato. Anaa dinha ang akong testimonyo nga nga napahiluna dinha, kon diin gisulat ko kini sa blangkong panid sa Biblia, ug gigisi kini ug gisuksuk kini diha nianang ulohang-bato, ug anaa kini dinha sa gihapon. Ug hinaut nga maisulat kini diha sa mga panid sa Walay Katapusan nga Pulong sa Dios didto sa Langit. Hinaut nga magpabilin akong magmatinud-anon bisan hangtud sa katapusan.

Iduko nato ang atong mga ulo karon sa kadali alang sa pag-ampo.

²³⁰ Sa pagtapos niining gabhiona, sa pagtapos sa niining, niining usa ka kapitulo, nga dili pa unta angay. Kinahanglan mo man gud nga hisgotan ang usa pa, ug unsa nga siya nagpadayon ug gipahiluna ang Iglesia diha sa posisyon Niini. Dalahon ko kini sa inyo sa usa ka higayon, kon itugot sa Dios. Kinahanglan kong makapahulay usá bisan og diyutay lang sa karon sa dili pa ako moadto sa Chautauqua, sa usa na usab ka dakung tigum, dayon motabok ako gikan didto padulong sa Oklahoma, gikan na usab didto padulong sa Klamath Falls, dayon gikan sa Klamath Falls diretso padulong sa California, hangtud sa Yakima, dili pa ako makabalik hangtud sunod nga ika-15 sa Agosto.

²³¹ Pero tan-awa ninyo, tugoting mangutana ko sa inyo og usa ka butang, kung aduna ma'y mahitabo sa inyo o sa ako sa dili pa moabot ang maong panahon, kung mitabok na ako sa suba paingon nianang Yuta, o kung mitabok na kamo ngadto nianang Yuta sa dili pa ang maong panahon, nabati ba ninyo ang kasigurohan karong gabhiona nga magkitakita kita sa nianang Lugar? Kung nabati ninyo, ipataas ang inyong kamot, moingon, "Nabati ko ang maong kasigurohan sulod sa akong kasingkasing." Panalanginan sa Dios ang inyong kasingkasing. Panalanginan kamo sa Dios. Kung adunay usa dinhi nga wala pa nabati ang kasigurohan nga maanaa sila didtong dapita, ug gustong moingon, "Hinumdumi ako, Igsoong Branham, nga maangkon ko kanang kasigurohan," ipataas ang imong kamot, "gusto ko pud nga maanaa didto, usab." Panalanginan ka sa Dios, gining. Panalanginan ka sa Dios.

²³² Among Langitnong Amahan, ginadala namo nganha Kanimong karong gabhiona kining kongregasyon, ang matag kamot, nga kutob sa akong nahibaloan, nagpataas, ang tanan gawas sa usa ra ka tawo, usa ka bililhong kalag nga atua sa luyo, medyo sila nabalaka kung makatabok ba sila paingon sa maong Yuta, kon diin magkaaduna sila og igong tinuod nga Balaanong gugma sulod sa ilang kasingkasing, sa nianang bililhong kasingkasing sa babaye, nga makapaingon siya nianang Yuta kung mamatay man siya karong gabhiona, mahimo ba nga birahon niini ang iyang nabalakang kalag pasulod sa Yutang Saad sa Dios?

²³³ Amahang anaa sa Langit, sa akong pagtindog dinhi sa pulpito nga nagwali, ug gipaningot, ug nagtuaw, ug nagpakilooy, ug nag-awhag, tugoting mangamuyo ako sa Imo sa makausa pa, Ginoo, tugoting mangamuyo ako alang sa akong igsoong babaye dinhi sa luyo; Dios, ipahimutang sulod sa iyang kasingkasing, karong gabhiona, kanang Balaanong gugma, kanang Balaang Espiritu sa Dios, kanang kalinaw nga di-matukib sa tanang panabot, nga iyang madawat ang Imong Espiritu, maselyohan sa Espiritu Santo hangtud nianang adlaw. Gusto nako nga makita siya, Ginoo, sa pagtabok namo sa taytayan. Kung ako nang—kung ako nang—kung moabot na ang akong pribilihiyo nga motabok, kung tinuod gyud kadtong Imong gipakita kanako, ug motabok na ako didto, gusto nako nga matagbo siya didto, ug makita siyang nagadagan ug gunitan ako sa kamot, ug moingon, "Akong bililhong igsoon, niadtong gabhiona Adunay nagsulti kanako nga ipataas ko ang akong kamot, sa dihang natapos mo na iwali ang Basahon sa taga-Efeso. Gipataas ko ang akong kamot, ug adunay nahinabo sa ako pagkahuman niadto. Ania na ako. Batan-on na ako karon hangtud sa kahangturan." Dios itugot Mo unta kini nianang bililhong babaye.

²³⁴ Kining mga nagpataas usab sa ilang mga kamot nga naselyohan na sila sa Espiritu Santo, nga anaa na kanila

ang Espiritu sa Dios, ug nadawat na nila ang Espiritu Santo, naselyohan na sila sa diosnong gugma sulod sa ilang mga kasingkasing. Ginapasalamatan Ka gayud namo tungod kanila.

²³⁵ Ingon nga among naamgo, Amahan, nga kining mga teyp mokaylap sa kalibutan. Daghang mga mikropono ang nakakonektar niining pulpito, nga nagkahulogang kasamtangang nagagama og mga pagteyp, nga nagarekord dinha sa luyo, magakaylap ang Tingog ngadto sa nagkalainlaing mga kayutaan sa kalibutan, sa tibuok kalibutan, baynte o traynta ka nagkalainlaing mga nasud ang makadungog Niini. Nagapangamuyo ako para sa matag tawo nga makadungog niining teyp, nga mga wala pa nakaangkon og paglaum sa Kinabuhing Walay Katapusan, nga mga wala pa nakadawat sa bautismo sa Balaang Espiritu, hinaut nga matam-is Kining moabot sa ilang mga kasingkasing. Itugot kini, Ginoo.

²³⁶ Ug nanghinaut ako, nga kung wala ko pa sila makita sa niining kinabuhi, sa pagtabok ko didto nianang Yuta, hinaut nga modagan sila ug manggunit kanako (ug gunitan pud nako sila, ug sila, nga magasinggit kami og, “Bililhong Igsoon!” ngadto sa usa’g usa), moingon, “Nadungog ko ang imong teyp mahitungod sa Efeso, kung unsa nga gipili-nang-daan kita sa Dios ngadto sa Kinabuhing Walay Katapusan, ug diha nianang teyp nga nadawat nako ang Tingog sa Dios ug naselyohan na pinaagi sa Espiritu Santo pasulod sa Gingharian sa Dios.” Itugot kini, Amahan.

²³⁷ Ayoha ang tanan nga mga may sakit ug ang mga nanag-antus. Angkona alang sa Imong Kaugalingon ang kahimayaan tungod ginatugyan namo ang tanan niini nganha Kanimo nga may bug-os pagpaningkamot sa Ngalan ni Jesus, nga Imong Anak. Amen.

²³⁸ Aduna ba dinhi nga nagmasakiton ug gustong mapandongan og mga kamot aron maiampo? Mahimo ba nga imong ipataas ang imong mga kamot? Sige. Mahimo ka bang moduol sa hilom, karon, padulong sa altar mismo dinhi, ug magtindog sa kadali lang, samtang paduol na si Igsoong Neville dala ang iyang. . .

²³⁹ Oh, medyo kini og, pag-ampo na para sa masakiton, daw sa—daw sa paingon na kini sa punto kon diin nahibalo ka na kung asa ka nagabarug, mismo. Ang Dios nasayod sa tanan bahin niini.

²⁴⁰ Pagmadungog ko kana nga awit . . . Hinumdumi, kung buhi pa kamo sa pagpanaw ko, ipatukar ninyo kini para kanako: *Only Believe*. Hinumdumi, dili ako patay, dili ako halayo sa inyo samtang nagapaminaw niini. Dili ako mahimong mamatay; gihatagan ako ni Jesus og Kinabuhing Walay Katapusan; pagabanhawon Niya ako sa kaulahiang mga adlaw; magkita-kita kita didto. Ug kung mopanaw pud kamo, nagatoo ko nga

ingon niana pud sa inyo. Nagatoo ko nga magkitaay kita sa usa'g usa pag-usab.

²⁴¹ Ginalantaw ko, kining bililhong gining nga nagtindog dinhi nga ubanon na ang buhok. Cristohanon ka ba? Puno sa Balaang Espiritu, nga nagpaabot sa Iyang pag-anhi, nagatindog dinha nga nagahulat sa pag-abot sa Sakayan. Amen. Oh, igsoong babaye... 

60-0522E Pagsagop #4
Branham Tabernacle
Jeffersonville, Indiana U.S.A.

CEBUANO

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org